


PL  
2698  
.J82



V.4





Digitized by the Internet Archive  
in 2010 with funding from  
York University Libraries





外集自叙

蓋聞才逐情生情從境感興有所會響亦隨之故蘭亭曲水紀逸  
事于流觴桃葉春江囀香喉于柔艣長安多古意遊絲將啼鳥爭  
妍麗日照皇洲艸色與蜻蜓俱醉酬茲勝日藉厥新聲亦有楓森  
巫峽葉落洞庭女蘿睇笑摹山鬼之雲容寶瑟淒清泣幽靈于湘  
浦斯則宋玉對以愁生雍門感之淚下者矣若夫水清月吐霜滿  
煙平凌波皓腕拾海月兮石華吸烝絳唇和流鈴于松籟颯沓轉  
空林之梵蕭條爲半嶺之聲斯則塵慮唐捐清機獲露幽人曠抱  
微有可宣以至高館張燈動離思于琴瑟旗亭折柳惜行李乎驪  
駒水咽河梁天長雲樹旣登高而送遠復感夢以懷人此柴桑所  
以有靄靄之章商陵因而臻悠悠之慨也其餘勦兒飲馬倡婦彈  
箏或葡萄美酒舞龍劍于帳前或繹繹花裙啼鳳聲于屏下薰宋  
鵲以博山之焰啼烏白于合歡之株下至鬪雞躡柳飛堦藏鈎樂


有多端咏難一例要以情鍾我輩樂所自生無慮江令之花繁莫  
遣參軍之才盡萬籟號而鏞箏並奏秋水至而瀾洑齊盈而又何  
必較量乎工拙按覆以神理也哉

石巢阮大鍼漫題



詠懷堂詩外集

甲部



石巢阮大鍼集之著

衲子德 浩宗白較

早春至平等菴憶宗白遊吳

寒花繞巖曲孤錫向何飛  
楚嶠嶺中秀吳雲鳥外微  
林香開藥路龕碧積苔衣  
君夢如諳此何須破夏歸

同楊順賢吳元起宗白循元牛首山閣步顧隣初先生壁間

韵

吾生婚宦兩休緣初服長容野衲連久矣蜉蝣閱塵世直將鴻乙  
辨高天青燈艸閣聽宵雨黃葉山杯煮石泉櫓拙真能忘歲月開  
香何必六時蓮

送吳大年還新安觀省期以春晤

君歸繞屋有梅花高枕天都峯頂霞怡老手能和大藥望衡人爲  
折疏麻時紛始悟簪纓累身隱何如釣弋嘉春艸且深江柳細白  
門期與共聽鴉

久客歸坐雪石巢開門人鄧簡之書并見懷作

遐矚及龍眠伊人臥紫煙雪光疑落月夢路不分天藥澗鳴晴屐  
松門吐夜絃知君吟咏暇思亦竹林懸

久客理山篋開君歲晏書古風矜未敗秀句諷難疎林淑求春鳥  
江暄徙霧魚幾隨磨鏡客來醉步兵廬

定情詩

微心入何際眉上遠峯青霞爲朝妝曙香因夜語靈通花馮一水  
隔渚笑雙星願得長如此簫聲響鳳翎

春山青欲近採藥路何寒自結持筐侶非徵敝席懽文情微笑處  
禪理澹眉端不定風花思如今幸可安



謝呂司馬豫石招飲

嵩雒長綿五色雲其間名世有升聞星河自衍難分氣圖史能留  
未墜文道在氎裘詢動履官閒琴閣擅清芬礪溪知有餘璜在師  
尙應追異代勛

九曲爭如砥柱何東南平奠此山河海陵治粟癰桑撤灞上移軍  
細柳和幕府清風覘馬骨車門白石營牛歌婆娑此興尤難淺銀  
燭青煙照碧蘿

贈朱白石

小慧輒彌天蹄涔不自憐于君觀溟渤握手向江煙月氣寒潮吐  
霜聲夕鳥宣茲焉開撰酌應不媿林賢

朝昏共言謔自不省途窮缺豈因魚擊歌還爲鳳工植交冰雪次  
晰義雨中歲晏情彌勝聊當謝谷風

過柏城精舍同宗白雪葉論詩盡日

人境終難旅謀閒就古林山扉照寒水彌習靜居心枕月夢恆曙  
馮鐘咏更深翻疑栖葉鳥歸帶市朝音

何以酬花雨空林諷咏翔筵簞心自苦菽麥辨難荒澹旨懷蔬善  
佳言敵飯香塵機無觸處銷盡竹林狂

羣社初集共用羣字

鍾陵曾未沫靈芬光岳難分聖代文高咏各師寒歲雪初衣交攀  
六朝雲霜前玉樹能迴豔燈下名花不亂羣鼓吹如今饒衆嫵竹  
林聊得寄餘醺

柬吳閣生明府

竹間鳳實香飲秋羣鶩剝啄知匪謀萬口各能寒碣永一官何惜  
春雲浮空山蘿薜閱人境晏歲雨雪綿滄洲飯牛長夜苦不旦朝  
雞失唱西江流

趙侍御二瞻陳駕部白安移樽江上相別



澹月微霜皎莫分于焉樽酒惜離羣  
津亭投轄秉紅燭子夜徵歌  
遏白雲棠樹如林寒未解梅花繞  
舍夢潛芬石門卽報春山綠擬  
採芳蘭一寄君

寒月同損之公穆宗白泊三山江上

江空演寒月羣象入虛無但省身心在因聞鴻雁呼  
明燈開筦簟  
激石灼樵蘇莫慮淪荒槭清琴試可娛

懷百子山

浮家恆累月遂有鹿門心汲水憶猿路栖煙懷鳥林  
高霞徵屢切  
清響蓄琴深何事迎潮月悽其霜露吟

三山方爾止至同損之公穆宗白月下集舟中得蒲字

空江小泊向寒蘆洲渚微茫雁夕呼月下聞潮如梵唄  
燈前剪菜  
卽伊蒲拏蘭不盡高丘思種秫難令下瀝枯共待海門芳艸候春  
香一醉步兵壚

送當塗徐明府松濤入覲

青山寒不解甘棠煙鳥水魚有泳翔小泊琴聲喧古雪高軒寫影  
入清霜陳風萋楚江鄉俗縮酒包茅澤國香湛露歌餘春艸碧花  
村竹馬看騰驤

舟次憶家園兄弟

檣燈篷雨暮江情此際何堪旅雁聲南舍地暗筠未解荒池春近  
艸將生雲峯夢到龍山秀潮月看如雁汶明好浣匏樽盛柏葉廻  
艚卜夜與同傾

送劉宜之北上應試

雪霽梅花香正繁看君征馬向平原星檠更曙前薪火聖酒新酣  
季雅樽桑土定知煩借箸苞稂還爲達臨軒漁竿已穩滄江夢聊  
望公車効大言

穀日爲太恭人禮懺入山因坐青蓮閣偶成



永祝南陔日齋心禮化城兼之苦塵役迫此愛山情水弱通泉脉  
林高越鳥聲悠然感香雨天女鬢華生

一氣當誰辨身光與翠微遙看城市裏朝暮碧煙飛喻法寒谿雪  
觀名野樹暉清機隨所觸晚磬益依依

譚別駕見紳以失職待訊同其令子客皖逾年雪中賦慰

澤國東風早羈栖有向隅靈芬難可問優孟復何須夢外嶽雲秀  
情中海月孤

譚東海人

謫居看整暇詩禮待庭趨

直黜知無憾南冠未忍論永懷向松菊再歲歷芳蓀春雪門長掩  
宵鐘諷尙存蕭蕭依古寺疏水卽君恩

寄贈滄州戴孝廉應星

江天晴雪漾輕颺安道遙牽千里思碣石詩成將問海上林賦奏  
幸同時櫻桃珠壓青絲籠楊柳煙開赤羽旗自有宮鶯啼恰恰雙  
柑何必聽黃鸝

走筆寄懷价人應試南都

山嶺叫秋月此際亦思君國士方抒策明時復右文  
肯虛鐘鼓響遂覺咏觴分得意鳴笳驚來喧皖口雲

自君之出矣日夕坐芳塘深艸謝時輩涼風追上皇  
文魚隨月賸白雁挾雲翔余亦懷京邑三山共褰裳

寄輓博羅韓寅仲先生

五柳歸來物外身擁書萬卷不嫌貧政成康樂疏  
山地隱就師雄入夢神擊筑永懷燕市酒加餐煩  
問澤中綸傳聞雙燕迴翔路來往無驚石洞塵

香雪羅浮萬樹繁于焉蛻骨亦何尊騎箕此日歸  
躔次挂劍何年向墓門謝豹春聲啼石竹麒麟秋  
夢枕山蓀佳兒景宋能爲侶作賦親招鵬舍魂

春雨感懷寄木公密緯逸少

然疑明聖世蠕蠕動黃巾野戍乖農務官徭及釣緡且尋榆社酒  
莫負茗洲春努力陳牛飯慵書獻大臣

寄懷方君瞻

春山青滿日君隱向何雲著艸文心壯瞻蒲穉事紛恬陰惟鳥和  
勝日測蜂分可憶研奇字狂歌盡夕曛

寄懷廬州吳太守淡玄

淝水春風引綠蕪使君五馬飲清湖但聽花下鶴鳴靜不畏城頭  
烏尾通白羽譚兵麾部曲絳紗退食擁生徒治平第一元家譜宴  
錫行看冠虎符

盧大參楚白見枉佩園

楊柳晴風漾海門隼旟獵獵照江村移軍不徙春畬火揮羽全銷  
楚澤魂荒徑碧從苔意吐短籬紅覺杏香繁何時重繫山公馬高  
唱鐃歌盡一樽



野人跡久隸樵漁幕府頻年闊起居清露友聲黃海鶴暄波銜尾  
荻江魚久知桑土饒成算閒過柴門問著書筦簞盍陳良話永蕭  
條殊媿步兵廬

首夏郊居貢戔自敬亭相訪同諸詞人小集

春雲遙向敬亭來石戶荒情爲爾開好是鶯花司令候莫辭魚笋  
拍浮杯柴桑且問泉明社芸閣還徵貢禹才良話松風俱未已林  
山暝色莫相催

初晴礪中同若仲六長散步逢家衡之兄入山相訪

空煙何所抑松篠亦晴吟拾此礪中步了然溪上心君方超艸露  
相共展巖琴詎屑林塘內嚶嚶別夏禽

寄田郡伯三峨

清風瑟瑟動門羅五馬時爲窮巷過問俗勤劬到陽雨憂天指點  
眎星河絕交共悟嵇生旨逢世慵賡寧戚歌白酒黃雞秋正美妬



人子復奈予何

潘將軍太宇防皖得代之日軍民皆不能別也

國士雄風冠石城憂時投筆請長纓曾提虎旅辭淮甸直遏狼煙  
至虜營楚澤黃巾爲嚙指江城白羽有先聲小孤不少燕然石蘸  
筆爲留大樹名

鄒觀察靜長久以書訊便中附謝荷艇乃從靜長淨業遊時  
事今如隔世矣

羣謠深省亦何恩爲脫昂霄野鶴樊歲月遂爲林壑有雲山安得  
是非存青羊索我成都肆黃犬絲他上蔡門近亦知君諳此趣臨  
風聊附接輿言

雙魚曾問水中央字字商坪芝艸香自哂據梧同土木遂慙報李  
越星霜喜無繁蝶干清夢獨此高蟾照隱囊尙有夙遊忘不得北  
湖小艇泛荷觴

感舊寄莫方伯寅廣湖上

山中蘭蕙畹俱荒冉冉懷人夢路長三觀封霞懸畏壘六橋夕月

飲滄浪

寅廣官東省移茗上

鶴聲不爲傳呼歇荷氣翻令案牘香安得浮家

過西塞相從一省志和狂

楸枰世事復何如七澤倉皇急羽書郢國是邨成蔓艸時賢報主  
有復輿鱸萼官舍猶能辦魚笋兵厨亦未疎江上煙雲湖上月與  
君出處共于睢

送又漢東遊

伏鸞毛羽亦應殊恥作春星繞樹烏自有高山銜楚調欲從子夜  
挽吳趨市中煙火尋簫客旅次風霜醉木奴不藉鴟夷載明月璧  
光先已照菰蘆

答袁稚圭寓江州見訊兼柬王臬使遂東丁文學元大

小閣滄江放性靈匡廬飛翠滿柴扃白蓮自昔繁賢社玄艸于今

繞客星鉗鉚鄉雲長臥篋琵琶秋月漸開亭雙魚一致無功否五斗應爲破獨醒

煙霜隨釣有鱸魚何必江潭可卜居下澗稻香充旅飯艸堂址在引籃輿買山將隱無彈鋏避地逢人諱著書惟有柴桑稱逸秀秋清堪與摘芙蕖

再送方侍御崧生北行

清秋汐月滿江湍建業雙魚約未寒方叔猷看驄馬壯步兵咏興鸞鳩安柏臺遙望標瓊樹竹里何期潯玉盤近日楚烽聞泯滅蓼香荷露繞漁竿

壽吳客卿先生七十

四朝香袞案閒人歸問枯碁說法因弘景豈能專十賚右丞差勿媿前身手翻貝葉應難老厨有芝苗未是貧更向蒲團消浩劫鉢松種取作龍鱗



寄懷高州畢別駕

題輿蚤譽冠南天高韵松明好共傳  
火繹村長聞野穫欄居猿亦被清絃  
銅魚大可邀釐保霜蟹聊堪拍茂先  
已向山廚藏百榼春風江上待鶯遷

壽何先生澹餘七十

初陽葭管報飛灰正是萊衣試舞迴  
聖世自能寬俊及高賢眞勿忝宗雷  
杯捲忠孝名長著喬梓文章節不摧  
卽此鍾陵堪陟降梅花歲歲好銜杯

偶答友人見訊

秦淮星聚向冰天握手相看一莞然  
辟穀自矜松已赤同車莫問艸何玄  
卿雲好映蘆中日霖雨還蘇綿上田  
更向桃花釣春水鷗鷺斜日對高眠

慈姥湖旅夜懷子卿風雨之和州



曠野悲難釋傷君又獨征暮帆迎汐路雨夜惑江聲旣斷顛風渡  
還驅疲馬行憂時兼念友遂覺一身輕

亦慕端君適平生心奈何未甘淪日月遂不有風波意與川原極  
形兼霧雨和車門張燧處未卜營牛歌

黃侍御了素以江州詩見寄賦答

秋水樓船泛太清水犀連弩刺長鯨溯洄亦有三巴字擊汰居然  
千頃情匡嶽雲峯開旆色小孤月汐感琴聲詩來片片峨眉雪小  
叩漁舷和濯纓

感時賦懔仲茅先生

謗高才子例直黜腐儒言但解危時組長開勝地樽伊濂行讓祀  
絳灌亦輸尊特羨鶯啼處高春正閉門

趙二瞻左左漆二使君招同李戒菴集古林菴

繁花微雨閣春陰驄馬偷閒過道林煙艸夢含韋曲色露葵香飲

輞川心時殷茗椀譚逾貴慮澹松寮梵更深何意帝城開白社青蓮結伴共招尋

送馬中丞岫旭移鎮皖上

春江芳艸積晴煙青雀西飛宛若仙久有威名驚萑葦直將樽俎寓戈鋌射鵬士習穿楊技買犢人畊釀秫田早晚饒歌喧皖口伏波舊柱爲高懸

送姚司寇岱芝予告歸雲間

三泖春深杜芷香遙知鷗鷺待歸航陶公碧柳舒芳月白傳青山隸艸堂蕉鹿久嗤塵夢幻蓴鱸新拜主恩長卽看簪履關羣注未許高巖挂薜裳

趙侍御二瞻攜樽過朱宗侯琢吾水亭

琢吾出盆中海棠相

賞

秦淮春水壯新柳漾其間遂引高人興來敦小閣閒燭修觴自拓

煙豁月知還塵次無凡語惟評所歷山

幾年春夢路幸不墮塵簪賴有烏臺彥能齊鹿苑心絳憐花豔小  
碧演酒香深不是嘶驄馬還疑集古林

柬答貴池楊廣文贊皇

芳艸因君憶遠天高齋朝暮九華煙吹藜太乙紗常曙立雪生徒  
履欲穿官寄琴樽非苦海家傳詞賦有甘泉懸知彤管讎書日祕  
閣還堪理舊氈

黎比部爾瞻見訊賦答

君官大隱類東方閒閱飛花點筆牀松閣遙分弘景餐竹林還憶  
步兵狂梁園艸色長通夢桃葉鶯聲欲媚觴抱犢自公多暇日詩  
筒知不負滄浪

爾瞻言其鄉袁計部環中保障功索賦賦此

睢陽烽至掩孤城保障聞資粉署英盡解篋金治牛酒手援桴鼓



懽狐鳴霽雲飲羽猶殲醜安石圍碁自郤兵試看梁園春艸綠千  
村買犢事深耕

柬以冲玉華兩先生

春野無非綠東山著處青聊支弘景笏一禮少微星  
衰鳳從來往恬魚泯醉醒長瞻鴻漸地藹藹有雲停

戈給諫敬輿過訪不值賦此

春城柳絮已陰陰小圃煩君物外尋窮巷煙荒朱雀艸野橋風遞  
碧雞吟花間覓句宮鶯和客至銜盃禁月臨華省幾時封事暇相  
遲同響少文琴

爾瞻以丁南羽畫羅漢卷索題

天都山人繪水月西來大意從筆生白雲仙吏復好事品題此繪  
水月情海霧霏微几上吐衣珠燦爛詩中明高陽狂客興亦靜碧  
酒到手不敢傾齋心漱齒花下露諷讚如撫秋琴聲點筆未已落



花至悠悠一鳥林間鳴此意忘言亦難繪無數青山籬外橫

壽陳母胡孺人六十

庭護熠熠冒朱華永日觚稜賀燕譁鹿嶠久開仙媼籍鸞車並集  
太丘家方平有背長留爪天女如朋共散花寧待孟公投去轍自  
偕晨肇乞胡麻

雨中同仁植坐元甫遙集堂飲奕兼訂宛陵行

高館旁羅梧竹陰相看竟日雨沉沉銜杯共悟忘憂旨坐隱兼銷  
決勝心紅葉緣堦閒飲露黃鸝隔樹細流音敬亭更探玄暉蹟雲  
嶺蒼蒼猿晝吟

壽張秀亭偕配六十

天門秋水碧如煙向夕琴高控鯉旋更有麻姑來降室爲歌平子  
賦歸田玄猿豢就能呼月白雀教馴欲戾天聞道志和仙舫在采  
菱沽酒縱高眠

題沈巨山謝懷閣

隱侯有遺構高擎敬亭雲樹影緣谿合猿聲清晝聞峯霞迎諷至  
山響候琴分祇恐臨風際玄暉轉憶君

再慰方時生

聖代何多故潢池警未舒時情矜拮拾峻法中樵漁義媿齊平仲  
歌深楚接輿思君授經地虹貫獄中書

壽俞文學其章尊人南金偕配六十

丁山南金隱處也

敬亭高隱亦何閒葛杖潘輿並可攀豹霧爭看騰子舍鹿門近卽  
在丁山風坪松響傳眞誥露圃芝香竊大還歲歲陵陽谿水綠浣  
花釀酒駐朱顏

東張二無尙璽二無昔之虔州任秋泊皖口便遊匡廬余媿  
未襍被同行也

江月挂秋樹懷君旅泊情橘香導帆路潮響素琴聲露白山猿叫

天清木客迎慙予多滯跡不共虎谿行

人倫推水鏡海月印珊瑚遂轉溟鵬翼來司殿虎符禽啼風館樹  
螢點水塘菰官况殊寒儉文心何太腴

范仲闡以遊華山詩刻見示賦謝

萬里峨眉雪從君腕相生能銷帳紗暑彌覺甌塵清空翠通山響  
蕭寒起瀑聲悠悠對雞黍不盡古人情

濤響翻松路如通博望槎手攜神女雨一澣石蓮花碧荔啼山鬼  
青芝飲嶠霞因懷夙遊地雲海浩無涯

送王梅和使君乞養歸滄州

離索誰能遣危時感倍深十年棠芾地三徑菊荒吟別思雲橫碣  
歸航月照琴銜觴增累歎不獨重分襟

春風吹野哭烽火照江干藉有貔貅旅終貽燕雀安苦心甚茶檟  
隻手繕泥丸往往籌桑土憂時淚未乾



荒城艱鼠雀發粟賴權宜不是天王聖幾爲內史危高霞騫鳥翻  
秋水泛鷗夷多謝中山篋爲成澣滌私

敬哉分袂旨從此戒憂天力整桐江釣深畊下潁田亂餘憐艸木  
歸興括山川相望秦淮夕帆園月共妍

哭潘木公

憶與分攜後褰裳約屢堅文魚思賸月黃鶴遽賓煙潮汐期俱素  
雲霞氣不鮮平生山水思悽斷子期絃

大雅何波靡資君砥柱孤閒吟絜芳艸逸氣絕菰蘆大壑風長滿  
空梁月易徂何堪葭莢際烟夕鳥相呼

三山延眺處雲海氣何昏白社傷蓮萎玄亭幸艸存秋香殘橘柚  
春綠剪芳蓀恨不從君後修文向帝閭

塵壻懸難忍看君鶴上遊蟻柯多寵辱螻甲自春秋誼友荆高在  
佳兒儼伋儔因聲寄河漢天上慰離憂

新晴同以冲先生坐弘濟禪院石閣

密篠幽篁繞定龕  
高窗更俯瞰江潭  
角巾飯衲嵩陽寺  
野火燒藜  
嬾瓚菴鉢影尚涵  
將曉月經行時觸  
未歸嵐知君衣白  
當隣聖黃  
葉容予掃石楠

壽弘字上人七十

庭松君手植今已漸成圍  
更待龍鱗長還看鶴子飛  
翻經花次雨  
挂衲竹間暉  
不問桑滄劫  
跣趺向翠微

園憩

于時誠足哂大隱亦隣欺  
惟與鸞俱伏方令鶴不疑  
倘非處谿刻  
何以謝磷緇  
采采東籬菊悠然意可師  
何以舒微尚臨流葦  
水軒藕花香入夢  
樹色靜如村  
萍聚游魚沫  
苔存步鶴痕  
繞籬多隙地  
隨意種芳蓀

多寶菴同清隱看月即送其入楚還訂浮渡遊

偶然乘月色縱步到柴關坐聽堂鐘動翻令庭樹閒軒羅當徑竹  
花隱隔窗山掛錫逢支遠清言詎忍還

牆陰環古木夕翠靄沉沉宛以千巖色移之雙樹林挑燈閒拂塵

踏葉偶驚禽更述蓮峯月支筇思不禁

浮渡有石蓮峯

席掛滄洲月筇開夢澤雲以君西向意當我北山文帆影晴空遠  
猿聲旅夜聞楚山秋翠積歸句倘能分

贈胡衛幕玄度

玄度山陰人

一官秋水寄蕤葭詞賦還分宛委霞祿養豈爲餬口計俸錢半入  
賣漿家署隣蕭寺聞清梵庭有寒柯偃暮鴉更是妙香生案牘霏  
霏仙幕隱蓮花

眞州晤張繩海同年

十年風雨嘆分襟握手能禁感慨深爲政久諳調馬法逢時不辨  
獲禽心苟非肉食寧華膺未有才人免陸沉桂醕只須相對酌江



潭何必發孤吟

舟行將抵家趙裕子以詩贈別依韻賦答

遠樹平疇江上村遙知穉子候柴門  
逃禪久覓安心法大隱宜蠲  
嫉俗言籬槿細編防竹母土花輕別護蘭蓀  
西窗夜夜聞清響風  
颭荷珠瀉瓦盆

江浦署中旅酌

獨酌憑誰寬旅愁燈前清影自爲儔  
月殘其色長隣曙蟲冷爲聲  
不借秋山夢薄能延野鶴郵書先爲達  
江鷗家園指顧銜杯外枕  
畔松風已覺稠

田間即事

偶然適田野日寓心且欣樹樹鳴黃鳥  
村村屯白雲牛閒戲陂水  
鷺立定波紋饒婦聞相語秧深似欲分

農家事勤動形苦神則閒十畝但求穫  
餘情何所關螢爭將暝樹

月展欲晴山何事長天鳥翩翻尙未還

還山柬虎仲幼玉長秀豹叔山甫大方諸子

大龍山中多白雲石門湖水涵秋陰雲近不離讀書榻水清照見幽人心皖上伏鸞茲數子靈襟妙遠清音旨智仁各自導其情弋釣爲能愜微理那堪長瘁風塵歸來種稻湖山間籬螯自肥菊亦坼一樽晨夕期追攀諸君意氣天雲薄時事需才又如穫翻愁聯奮赤霄行令我水雲長寂寞

壽錢爾卓先生六十

縱江水何冷冷蛟臺樹長青青中有至人遂貞吉著書萬卷睨玄亭布帆掛月澹秋水茅齋煮酒遲春星干時恥鬻長門賦隱居靜閱山海經風塵四合天冥冥昔之朝肆今滄溟少年痛哭亦奚以老兵大醉誰能醒先生不食五侯鯖先生大笑傾醪醢燈下機聲響閨閣風前蘭露盈堦庭玉趾朱顏何靜好無須採菊榮頽齡世

事久捩澆白墮壯心況未寒青萍悲風老驥自喧櫪昂霄野鶴長  
梳翎飯牛行歌白石粲釣魚莫厭磻溪腥秋來擬汎樅江舫南飛  
之鶴聲堪聽曲終更進橋上履松花試掃山間局

宗白刺舌血寫經

芭蕉寒透石林霜爲錄靈文閉竹房合是髓枯驚帝釋將無臂斷  
擬神光微微花雨香衣氎點點丹霞印筆床共解廣長多寶相墨  
池真欲陋鍾王

張紹和孝廉過訪學稼山堂依韻賦答

金門久矣謝簪纓大隱清漳漳水清虎觀經應橫左席雞林賈亦  
豔高名懷人星駕來千里敲月山堂欲二更深夜樵蘇無可薦閒  
馮猿鶴作將迎

指點桃花問索居蓬蒿一徑亦無餘別來明月梁頻滿何意深林  
屐不疎浮白盡傾家釀酒殺青細較住山書東臯禾黍東籬菊農



圃吾何媿不如

石門秋汎無題

慵向官家乞鏡湖自操小艇問羅敷遠山秋水渾無賴得似卿卿  
眉色無

宛轉琴心動畫船蒹葭秋水白如煙兒家住在橫塘曲夜夜吳歛  
唱採蓮

慵逐紅塵墮馬粧琵琶獨撥上孤航湖邊定有鴛鴦睡子夜歌喉  
漫繞梁

波心燕語亦呢喃小尾雙雙故掠帆正倚蓬窗微笑處香泥忽濺  
杏紅衫

依韻答錢虎仲春日見懷

春氣新暄上已餘野畦香滿菜花初江雲罨樹晴猶濕岸柳綿煙  
淡復疎水近鳬鷺長暝檻雨勻鳴圃各尊鋤板輿采菽能爲供潘

令誰云遜不如

故園煙柳繫予思  
斗酒雙柑正此時  
除目懶翻朝士籍  
俸錢平付友人支  
看雲寤寐通江閣  
憶竹平安訊露枝  
籬落種花巾漉酒  
真嫌陶令賦歸遲

書生肉食敢籌邊  
久負雲霄侍從班  
憂杞戈難揮落日  
採薇屐欲趁晴山  
娛親試覓田家樂  
佞佛還貪丈室閒  
兀坐無勞形問影  
置身全在不材間

清池蘋藻正斑斑  
小築茅亭灌木間  
月下琴聲響齋閣  
雨餘苔色映門關  
徑存松菊難鋤傲  
石有藤蘿可恕頑  
何日腰鎌隨老圃  
繁花惡竹與君刪

竹下同劉樗隱張損之對局

環齋綠玉隱森森  
細剔繁枝透遠岑  
月令箋書粘戶牖  
山泉竹導至園林  
季鷹蓴菜情偏洽  
劉尹茗柯理亦深  
艸閣疎簾清似水  
此

中橘境醵相尋

新秋招殷徵卿過山齋因譚楚中山水之可遊者

秋氣還林薄悠然動遠思因招江上客閒賭竹邊棋雨後籬花潤  
風前絺服疑塵情渾欲盡微諷漣陽詩

芳艸滄洲上秋知綠映舟幾隨浮客棹共作漢臯遊花覆羅含宅  
江清庾亮樓宜城多美釀莫不貴鸛裘

山居同徵卿偉長共賦

荆扉農節不令關荷蓀攜壺任往還竹塢兼旬苔每厚松風入枕  
夢多閒論文漸罄盈樽酒乘月徐登傍宅山浮渡石蓮聞更長幾  
時屐齒印花斑

高話羲皇到日西山翁互答不相疑偶聞遙浦傳漁唱坐見村煙  
動晚炊歸鳥漸喧深竹徑閒魚自躍野萍池荒厨已貯賢人酒候  
月升林酌每遲



秋陰雲氣滿村居爲愛婆娑樹繞廬小婦藥欄閒鬪鴨村僮荷葉  
漫包魚竹聲報雨涼歸枕菜甲連畦味入鋤酒後放歌山月出清  
光遙映一床書

雨餘山氣始微秋桐露庭中冉冉稠抱石每疑雲有蒂映花微見  
月如鈎竹深不礙山雞舞露冷惟供野鶴愁擬共同心扃籬芷空  
江釃酒祝靈修

宗白結夏海嶽菴訊之

遙知杯渡處北固臥秋雲久客別山月歸飛趁鴈羣瀝泉水蟲活  
讀律夜香聞來就東籬菊叢深待爾分

海門秋欲半瓢笠尙何依積徑苔應厚映簾花已微艸喧蟲領月  
松響鶴臨扉蘆荻滄洲滿無煩杖錫歸

江上送張揚伯憲副絲楚之粵西任

槎邊楓色映江臯酌酒爲酬魂夢勞素影杯流天柱月秋聲句挾

廣陵濤仙樓舊蹟能招鶴  
猿峒新傳欲旅葵枝戟百蠻羅拜畢憑  
君痛飲讀離騷

清秋驛路繞瀟湘  
畫隼遙迎嶺桂香  
鄂渚尙傳棠滿樹  
庾樓莫負月盈床  
雞林賈識詞人墨  
象郡氛銷法吏霜  
聞說椰漿堪釀酒  
可分升榼到江鄉

村翁見招止之飲

村居客晏起乃見秋林閒  
夢聞剝啄聲野老來叩關  
告我家釀熟又云山月還  
邀我過其廬爲破苔蘚斑  
余感此意真坐對怡心顏  
射魚芙蓉陂採豆藤花間  
共罄床頭樽閒眺籬門山  
即此邁羲皇世人何足攀

徐仲衡文學過訪

村徑秋雲冒碧蘿  
柴車何路得相過  
幽栖歎客惟看竹  
卒歲謀生有荷蓑  
放鶴青田宵聽唳  
飯牛白石旦聞歌  
厨貧高士知無哂  
黃

葉山齋薦晚禾

答黃四長客楚書訊

秋聲警羣木想見步兵廬賤子已謝客故人還寄書帛遲湘浦雁  
缺冷武昌魚但飲樽中酒無爲賦索居

山居微拈上人從江上過訪

晴江峯影望清芬隱隱鐘聲夢裏聞出世蓮花能不染入林橡栗  
且相分蓼香吹水鴈啼月松葉漫坪鶴唳雲巖下一龕聊止宿莫  
嫌空翠太氤氲

重九前二日馬時良宮詹繇楚履南院任

楚江楓映鴈天霞到處門生擁絳紗帆載庾公樓上月舟經陶令  
宅邊花碧腴滿瓮醅初熟黃纈敷林樹已嘉且辦茱萸供插髻白  
門何必遽聽鴉

時良曾主楚試

白下官閒勝隱居石渠亦可賦焚魚留賓廣製平津被訪客時乘



下澤車奇字如蠅勞指點名山列翠藉吹噓龍江即有非熊載何  
必南陽下鶴書

同前之弟宿平等菴看月

疎鐘隱隱動寒潭初地青蓮好共探野菊叢生皆廢圃閒雲長住  
卽精籃月臨霜夕光彌縱酒照青燈意更酣不寐始知禪室冷掩  
扉聊與隔秋嵐

賦得寒燈靜深屋

園林值秋暝夜氣更幽窕室邃寂軒窗人閒罷吟嘯羣動入晦息  
孤燈耿相照壁影定菊情繁聲聽花笑檐間鳥夢安籬明鶴行悄  
沉冥爾時心寒潭與相肖涼月印空明吹萬息霜篠

初冬集多寶菴得林字

蘭若去城不咫尺竹樹邃複同幽岑野畦隨意吐殘菜高枝犯月  
能宵吟余欲秋杪快登陟屢苦山雨長陰淫節候此時倍蕭瑟壺

觴不憚相招尋潭間靜水白自照籬外寒山青復深入社都無謝  
客輩開士俱如支道林佛香頻續不令散茗椀既罄還爲斟施臺  
直欲分鳥食松寮何但投華簪柴門礚礚不遽別因翻積葉喧栖  
禽

秋日坐宗白竹房過止水菩提蘭若

偶來逢解制良話歎柴荆竹響度山雨蟬鳴矜晚晴汲泉嘗澹旨  
挂笠識閒情起眎秋林外空江月已生  
鳴磬翠微間人同秋樹閒籬邊漁曝網塔外雨晴山以我入林意  
依君杖錫還明燈看黃葉幽興與相關

百子山別業

谷口雲深處風傳樵斧喧嵐開微辨路林接自爲村人與山損習  
家推穡事尊等閒門徑艸眠虎跡猶存

生計屬樵漁茲峯深可居響雲千嶂瀑媚水百化廬社薦迎神酒

山藏種樹書歲寒長閉戶慵爲整柴車

霏霏連曉暮嵐翠降檐楹足寄東籬適躬還南畝耕煙霜寒日氣  
松栝亂谿聲笑看閒原上山禽繞犢行

霜坪黃葉路不隱鹿麋蹤轉谷石微却遮門雲數重古藤閒掛月  
虛壑靜傳鐘晚集山燈下依依話老農

遞跡湖山曲遂令幽事親閒田晴範土野渚靜浮綸雲外聞鐘動  
峯前與寺隣霜枝攢竹屋戶戶等秦民

瀑水當軒落清音動艸堂衣能緹薜荔居直割柴桑門有流雲跡  
池生積葉香塵情不到處幽夢石林長

萬松菴

香臺人境外隱隱遞疎鐘漸覺水聲泯始徵嵐氣濃燒廚多澗藥  
釀蜜護崖蜂木客栖何處林間或可逢

喜張鳴玉自白下至爲葺菴園



雙鶴盤雲起，知君到艸堂。  
聞猿秋浦月，隨雁秣陵霜。  
就竹支書閣，欺花置石梁。  
肯令休沐勝，獨說午橋莊。

喜何舅悌孝廉見訪因讀其遊匡廬詩

思君看海月，閒照薜蘿心。  
杏苑行相待，茅齋還見尋。  
寒濤湓口聒，空翠石門深。  
一達清音理，霜途恣苦吟。

有美南宮彥，梅花引咏新。  
弱齡名已著，萬卷家仍貧。  
抱策謁明主，停車尋故人。  
霞情映林壑，幽谷已先春。

留別大方豹叔

谷口暫相別，憶君魂夢勞。  
汲泉井花濕，映諷雪痕高。  
山鶴銜奇字，秋鶉戀縵袍。  
明時當側席，莫便註離騷。

寒知罷探薇，歲晏假荆扉。  
臘酒熟自酌，江花春又飛。  
對之理吟嘯，可以謝輕肥。  
日夕山園暝，煙中聽鳥歸。

寄訊張揚伯憲副粵西

霜落灘江水更清，煙林幾曲度鴻聲。  
閒招蠻長詢風俗，遍鑿星巖注姓名。  
虎落燈深聞夜織，蛋人漁罷理刀耕。  
伏波銅柱今荒艸，扼塞須君五字城。

同大方損之長子叔衡之兄集之弟素園得威字

人閒共探薇，酒熟掩山扉。  
林外江帆度，煙中野鵲飛。  
初弦銜月影，勁葉略霜威。  
更聽留歡曲，迷花詎肯歸。

社集大方酒可齋得廻字

雪後蓬蒿徑偶開，香車亦爲問奇來。  
清樽刻羽聞桃葉，深夜燒燈剝芋魁。  
江鴈啼沙霜漸落，山禽噪樹月初廻。  
寒林澹澹滋芳意，高咏能無動標梅。

村晏

田舍歲云闌，鎡基滿戶間。  
濕烟低繞屋，寒日薄籠山。  
汲井氣常煖，喧村鼓不閒。  
夜深念僮僕，輸稅返柴關。

輓會稽太守齊越石先生

秋山雲樹正相望弔鶴何時下艸堂維帝欲收河嶽氣伊人遂歇  
蕙蘭芳胸餘剡曲千林笋家剩成都數畝桑尙有平生蝨蚪字離  
離芸閣散餘香

夙昔心期慙德隣慈恩詩酒杏園春初衣久遂雲中臥奇服翻爲  
帝所賓官過賈生寧歎拙勇方陶令豈辭貧龍眠秋露滋瑤艸煙  
駕知君賦采眞

歲晏答密觀見訪

結宇青蓮出世氛銜花麋鹿自爲羣鐘聲靜響千峯雪澗水寒流  
幾道雲夜就山燈縫戒衲閒標指月映靈文冰條漸解林香動春  
氣還從寶地分

出山詩

崇禎元年春

敬承休命趣守舊官脂車首途爰賦斯作



伊余耿霞尙作息依幽岑鼎實慎自保朱紱非所欽四時守玄序  
萬念休長林白雲停我岡蘭菊佩我襟鳥雀翔我廬朝夕遺之音  
稼穡藉僮僕并稅則我任永矢貴丘園無令塵冕侵皛皛天宇曙  
習習惠風吟野情正歡豫休命乃將臨眷此休命嘉青陽啓重蟄  
墉隼倏電驅蓬鴻漸雲集遂迴肥遯思黽勉簡書及宛雒何煌煌  
南陔固已習榮木耀春園朱護被庭隰飭彼車上巾媿此籬間笠  
婉詞別農圃菊松煩代葺行頌天保章卽廣考槃什秋色佳千峯  
期與歸雲入

晚次舒城同程搏仲張損之衡之兄前之弟夜酌

春煙繞桑柘于此問征軒野渡水漸活燈宵市火繁梅知攢水曲  
月定照山樊共有江鄉思誰能負一樽

寄訊游肩生侍御客石頭城

數載竄江城江花幾見春蕙蘭尋楚服雨雪滯孤臣日積思親淚

天留報國身，篋中傳諫艸。會徙漢家薪，

石城芳意動。君去探梅花，歸雁迷春雪。啼鳥徹曙霞，明庭行側席。遷客詎還家，試就長千里。聽宣北闕麻。

次臨淮楚友曹長卿自石城來送賦別

天山虜騎盈，太白亘邊城。國老苦無策，書生偏請纓。金隨收駿散，弓爲射鵬鳴。廻望晴川艸，空傳鼓吏名。

折柳過淮西，聽余斑馬嘶。楚臣香滿佩，山驛雨聞雞。遙夜飲春酒，殘星點坂泥。江鄉蘭芷候，別爾意俱迷。

寒食雨

久客知天候，寒徵春雨滋。垂垂雲被野，晶晶水生陂。戶圓龍蛇火，巢營乳鵲枝。陽和方布節，不是四愁時。

大店驛別搏仲社兄

搏仲授經此地

客裏復何別，扳條古驛前。柳吹淮甸雨，杏坼講壇煙。極目歸鴻影，

長謠芳艸篇遙知修禊日歌咏動春泉

彭城東史倉曹蓋卿

舉世競榮利伊人遵蹇拙通籍三十年一官長蹶躄緼袍衣弗恥  
藥碗貧自啜廣陵食貨區雄麗今古絕花光亘霞上歌鐘窮曙撤  
而子讀書堂薜蘿垂古雪狐寒藉酒溫羅閒恣鳥媒白華孺慕深  
餘芳澹何悅初服寄煙霄除書至雲臬執戟再爲郎屢敦方就列  
遙遙塵隱天噫噫蜩鳴葉白日慄神魂端居廢言啞誰能長串羈  
堅以謝緇涅朝辭雲陛旗暮秉徐方節徐方苦昏墊氣象如鴻荒  
空城鬪魚鼈曠野稀牛羊抱關亦勞止握算增慨慷冰沙冬復春  
溝壑岷與商舟車日夕交隸卒多流亡三值藩節經供億敢弗臧  
念子茹百荼不第空筐筐妻孥日以謫英聲日以揚余方之舊官  
問津河水傍春條感手扳臘酒臨路香對酒放心神四矚天宇光  
麗日旬前照祥雲川上翔虞門啓玄籥禹會集春王勗子土壤心



貢此五色章天衢爲君亨寧復咨馮唐

寄懷劉敬仲秉憲曹州

嶽色靜且寒河流澹方皓東風吹我心夢見河邊艸吾子淦陽英  
冲融稱國寶秉憲肅東方懸象日初杲莞聞偃邑賢品預山公藻  
秋霜警蒺藜春煙亂桑棗政平人自和訟閭烏歸早對酒每長謠  
翻書則幽討皇路告清夷妍芳易枯槁時康仕學兼能令懷抱好  
土風革蟬蛸聖德歌天保詎使長居東袞還赴京鎬

過廣川飲謝奉常青墩園中

奉常正居廬

東來淑氣動平蕪每憶芳池景物敷練馬辨應窮日觀天人策久  
著江都

德州董仲舒故里

月淒庭樹慈烏止風捲門羅野雀娛姑孰青山

春並冶知君夢亦到菰蘆

晴瞻嶽色幪車前藹藹鮮雲暎廣川三觀曙霞升海氣一時甲坼  
遍林泉山杯醉買平原酒春夜燈分太乙煙同是曲臺留滯客時

清正好著封禪

訊范奉常質公廬居

艸木悅春氣灼灼弄芳華  
柳乘鮮雨滋蕙就溫土芽  
天地何其仁鳥獸咸孔嘉  
余亦感余執遙矚川上霞  
素節砥冰霰靜眼嗤塵沙  
勇辭卿月輝澹植山園花  
舉世冠嵯峨而子方衣麻  
豐屋競四隣子門還啼鴉  
鴉啼亦何苦麻衣竟如雪  
豈不豔輕肥義難忍緇涅  
綈袍以御寒飢塵聊自啜  
洗耳河流清沐髮晞陽揭  
幽夢通明廷起居塵朝列  
平生舟楫心甯爲時康輟  
余方解碧蘿華簪步時哲  
先期戾短翰爲君導雲翮

寄訊白瑕仲山中

雲臥寄何峯琴樽近亦慵  
一壇杏花發雙袖橘香濃  
月出聞山狖宵深集露蛩  
秋懷知莫寓况聽隔溪鐘

讀吳師每倪鴻寶爲質公賦古盤吟因作歌

繡硯齋前竹領雲齋中圖史如蘭薰主人宴客晝兼夜嬌歌失憶  
春宵分燭花細剪西窗碧茗飲亦爲傾一石古盤擎出滲古光秋  
水冰霞冷相射此盤見獲聞甚奇云際方春鷺蟄時園丁破土發  
羣卉揮鋤中之仍無虧埋藏那復窮其故睢盱定有精靈護甕中  
魚藻爛花紋赤磧青泥兩難蠹夢章英聲振北海昔時瑚璉居然  
在磷緇肯受風塵欺餽饌將無噉眞宰因珍此器長摩娑器亦資  
之永不磨明堂會須持薦玉山禾噫嘻乎延陵大夫稽山太史且  
莫頌當聽江東步兵阮生來作歌

信宿質公繡硯齋賦別

屢就高軒榻知君古誼敦春星動遙集蘿月透深痕帙蠹將芸辟  
窗風藉竹有情眞驗僮僕下食意俱溫

荷露歌爲質公歌兒賦戲作長吉體

銀浦沉沉深煖雲膩錦魚翻波掠荷戲清露淋漓不可收嬌風射人



人欲醉漫葉離離學啼眼玉鳳香聲縷繹轉彈情惹恨無端倪使  
我雙眉不能綰廣川才子金閨客九天手劈麒麟紉棗昏榆睡動  
長噫臥破梨花餌春雪冰趺翠葆嗤青泥的的明珠萬葉齊藕絲  
接腸唾芳霧桃笙貼夢蟠晴霓天不荒地莫老花海人間春浩浩  
閒搖鸞尾刷雲樓照見南山石芝好

過雄縣堤上

春淀難爲涉悠悠客思盈居人理魚筍旅飯雜葍羹浦靜宜鷗汎  
風暄迫艸生廻思漁隱處江水幾灣平

崔饑仲宰易陽有善政兼讀其諸刻

茂宰需才子風流人共賢琴鳴秋水思花漲夕陽煙仁政鳧魚領  
文符井里傳此邦遊俠窟香令獨能仙

梁苑推英藪如君美信稀能將讀書法種取縣花飛陌煖徭桑茂  
春深壟麥肥是郊真樂土鴻雁復何歸

宴鹿菴相國西郊杼居。

朝英營物外，築館俯清泉。理亦預疏鑿，游能偕聖僊。盤匝羅水碧，徒御動山烟。不羨城南曲，空瞻尺五天。

樓居升水氣，澹澹映春叢。頓覺耳目適，遂令心地空。香光浮艸樹，刻畫到霓虹。勝地應千載，青山倚謝公。

浩劫塵沙遠，同時魚鳥親。詩書修我法，花水隱秦人。潤幄欣雲至，遮檐驗柳新。酒醒坐磐石，迎月更垂綸。

舉目誰長物，軒開雲滿山。窪田催種蛤，稚子囑調鵬。門館無私覲，方書有大還。青春稱辟穀，仙骨詎令孱。

上相駐柴車，村翁話起予。乘春飯羸特，擊水聚馴魚。靜覺行生會，誰言經濟疎。翻愁涓濱獵，物色溷樵漁。

烟水依依處，時看白鳥飛。閒情雲共臥，靈境世應稀。登戶泉聲聒，映簾山色微。江鄉此何異，遊客宛如歸。

劉燕及先生招飲梅川四高樓

朱堂粉堞水邊樓樓上琴聲興更幽縱是天供閒景物也須人闢  
好林丘頻開白墮觴賓客便拜青山作督郵宴客竟忘歸路暝小  
橋列炬聽鳴騶

過閔汶水茗飲

茗隱從知歲月深幽人斗室卽孤岑微言亦預真長理小酌聊澄  
謝客心靜泛青盞流乳雪晴敲白石沸潮音對君殊覺壺觴俗別  
有清機轉竹林

詠懷堂詩外集甲部終



詠懷堂詩外集

乙部

石渠阮大鍼集之著

納子德 浩宗白較

還山詩

天啟甲子年

承明未釋履霜憂補牘聊陳蠶食謀聖世何嘗分蜀維野心長此  
托巢絲寒蘭秋露滋芳畹種秫春煙動綠疇自喜臣情遂休澣白  
華晨夕咏悠悠

拂袖行吟歸去來艸堂猿鶴莫相猜雲霄自媿無脩翮雨露誰爲  
棄不材刺版不通羅雀舍釣絲閒集射蛟臺浮雲去住何須計笑  
盡山樽酒一杯

十年小艸泐風塵五斗于人太苦辛削木爲鳶應是幻以蕉覆鹿  
定何真簾垂幄就成都卜瓶罄甘同粟里貧但願九圀歌帝德管

劉燕及先生招飲梅川四高樓

朱甕粉堞水邊樓樓上琴聲興更幽縱是天供閒景物也須人闢  
好林丘頻開白墮觴賓客便拜青山作督郵宴客竟忘歸路暝小  
橋列炬聽鳴騶

過閔汶水茗飲

茗隱從知歲月深幽人斗室卽孤岑微言亦預真長理小酌聊澄  
謝客心靜泛青盞流乳雪晴敲白石沸潮音對君殊覺壺觴俗別  
有清機轉竹林

詠懷堂詩外集甲部終

詠懷堂詩外集 乙部

石巢阮大鍼集之著

衲子德 浩宗白較

還山詩 天啟甲子年

承明未釋履霜憂補牘聊陳藋食謀聖世何嘗分蜀雒野心長此  
托巢絲攀蘭秋露滋芳畹種秫春煙動綠疇自喜臣情遂休澣白  
華晨夕咏悠悠

拂袖行吟歸去來艸堂猿鶴莫相猜雲霄自媿無脩翮雨露誰爲  
棄不材刺版不通羅雀舍釣絲閒集射蛟臺浮雲去住何須計笑  
盡山樽酒一杯

十年小艸溷風塵五斗于人太苦辛削木爲鳶應是幻以蕉覆鹿  
定何真簾垂慵就成都卜瓶罄甘同栗里貧但願九圍歌帝德管



絃時沸大江濱

滄江聊可濯吾纓窮巷蕭條艸自生掃徑定知童穉候饋漿莫遣  
旅人驚龍山佳氣朝飛爽雁汶春潮夜吐聲應接清音渾未暇廻  
翔應不羨承明

奏賦金門願每違年年敝盡黑貂歸已捩襜被投名嶽何意鳴珂  
拜瑱闈腐艸爲螢難自照長霄與鳥幸高飛人生豈必皆朱轂下  
澤烏犍策亦肥

神武門前拜表行雲裝煙駕理孤征星古處士山中臥影弄嬰兒  
世上名但使榆關銷轉鬪何妨花塢有深耕故山片石真堪枕况  
有松風雜梵聲

京塵冉冉鬢將枯鷄肋何知味有無宦海驚濤迷象馬名場孤注  
奪梟盧雲林繞屋千竿竹烟水浮家一幅蒲招得二三物外友江  
湖鷺序未應逋

百年彈指即經過對酒高歌能幾何  
棧豆一官何顧戀鏡花雙鬢已蹉跎  
峯霞缺處穿籃筍水氣香時採芰荷  
一枕黃粱酣夢醒簪纓蘿薜不爭多

落日江晴開水烟柴門正對大江邊  
婆娑小葺藏書閣歎乃遙聽載酒船  
花鳥肯嫌官况冷蓴鱸逾感主恩偏  
山中暇日渾閒事芳艸春深抱犢眠

蕭蕭五柳夕陽斜蓬戶難辭鳥雀譁  
客至一樽傾黍釀行吟雙髻插山花  
攜筐石塢收松子行藥雲根剪蕨芽  
誰謂幽棲人事少閒居拙政頗繁華

潦倒眞嫌息影遲北山今始事逶迤  
桃花好問秦民棹蘭芷能邀公子思  
學稼農時循月令招魂蕪俗賦騷辭  
逍遙自許同煙客鍾荷千峯信所之

金門無術習浮沉歸亦慵爲澤畔吟  
篋有圖經標五嶽臥勝杖屨

入千林江鄉水族秋饒蟹艸閣山燈夜報禽幸以耕桑酬帝力角巾真不讓華簪

浮名落照意俱閒閒眺飛鴻度遠天野酌長依孤嶼月初衣全澣五陵煙每驚秋雨鳴山竹更憶漁歌動坨蓮不識香林舊明好遲余可過虎谿邊

無才安敢點朝班物外樵漁尙可攀任有網羅及鴻渚誰將柯斧指龜山種成芝術容招隱鍊就松脂學駐顏秋夜靈臺占氣象少微的歷照江關

舟次別陸都閩鳴野王淵泓朱殷如二孝廉

郵程次第水雲間棹雨檣燈每共憐笑對鷗夷麾白羽醉看龍氣隱青氈山樽細遞茱萸酒卽竹輕挑橘柚煙別後相看明月吐莫忘飛夢艸堂前

懷止水宗白清隱小止諸上人



雙樹挂殘雪與君瓢笠分別愁歷煙艸歸夢破江雲月給閒猿嘯  
經資衆蛤聞白蓮秋露滿巾氎想清芬

雲水暎茅茨人閒起臥遲蒸藜抱秋葉曝衲向山枝潭影澹相照  
松風幽自吹不知秋梵地幾雁落江湄

莫園柬余駕部集生

莫園有尊者地淨神且圓座聞衣袂香語破鴻濛煙羣魚咸聽法  
枯樹長安禪放心浩劫外置眼無生前丘陵旣以夷日月安得賢  
何況牛領蟲而別萬與千爲我發大慈木鋸相披宣振以塗毒鼓  
濯以清泠泉解我文字縛割我兒女緣令我毛髮豎所履如深淵  
如飄海失針天水空茫然已如蠅觸窗觸觸行復旋子入上舍城  
余津問何先綸竿願相投往釣船子船

宿集生睡渡閣

集生法諱道裕

就宿裕公潭潭莫適爲主水恬魚遞鳴林定月閒吐露欄藥氣集

風閣螢光靚靜者夫如何兀然一無取隨拈雨次花笑拂燈前塵  
山鬼避軍持諸天爭法乳聽中蓮漏微擊際竹聲苦彌天何可尋  
斯人庶幾古

采石遲曹元甫

雲破青山曲斯知煙駕來薄遊動躔次長嘯起江臺仕已垂門柳  
寒溫觸手杯飄零吾已預白也倘無猜

同實甫衡之兄九華南陵道中作

客路悠悠雁影連歸心同指石門烟江南地濕山多雨月令秋升  
露領蟬衆瀨色憐春穀碧羣峯雲讓九華鮮郵亭夜更親杯酒短  
燭孤花亦自妍

送劉徑石北上

大風捲秋色日夕五原來月滿虜騎突沙寒蕃馬哀丈夫輕出塞  
時事急遶才此去飛狐北期君勒石廻

擊汰送君行秋雲江上晴芙蓉嬌劍色鼓吹雜鶯聲杖策恢遼海  
鉦廻掃北平指麾煩白羽莫仗漢公卿

秋雨送區啓圖陳路若遊廬山

響雪聽秋瀑尋蓮過月谿匡君好相待烟客復同攜江雨雁低度  
山寒猿晝啼如何此時別葭莢白萋萋

送任憲副士彥奉太夫人赴濟南任

青楓江上散秋清千騎看君將母行岱嶽雲霞長作雨魯城絃頌  
易爲聲釣鰲好展經綸手拔薤無矜骭麟名更說諸侯多負弩板  
輿隨地有逢迎

石巢菴月下同璩山甫夜話

禪室對秋樹別君驚隔年風烟謝雙髻燈火共諸天閣冷通山翠  
琴清稱月泉茲宵聽靈籟彌覺石林偏

鴈堂秋月白薛影晚同依山夜笑言響人閒飲啄微磬從香際發



螢向露中飛塵世浮雲理知君泯是非

答方駕部潛夫書訊

大龍山色好小隱各能分衡宇對羣岫卷舒同一雲秋燈村杵報

蘿月夜絃聞所幸南浮畔非熊只夢君

南浮潛夫別墅與余鳩嶺甚近

昭世無經節孤生易歲寒竹烟通鳥路花水媚漁竿苜蓿大山火  
鯨鯢瘴海瀾野情都不繫聞爾卽登壇

李潛山庚白以詩見問用韵賦謝

疎狂禮法久相仇農圃如今倘自繇  
鰲鰕薄能通野月濯纓時復耐寒流  
掾曹忝竊徵三語居士寧慚號四休  
天柱近傳仙令尹吟來笙鶴破窮秋

寄訊瑩公寓錫蓮花菴兼期入城爲諸學人說法

聞君投錫地坐臥繞香雲屢日鳥聲斷  
一秋蓮露芬迎溪安藥臼斫漆註靈文  
雁落當峯首獨啼達夜分諸天陳飲饌  
流水印聲聞

笙象何嫌滯津梁未厭勤覺花無吝彩法乳有殘醺余亦安心者  
還來白社羣

秋杪吳幼玉劉長秀謝莫京招集水雲蘭若得孤字

難負莢房節言尋蓮社娛閒情眷蘿薜野酌就江湖秋暖蝶仍戲  
沙寬鴈詎孤蕭晨資勝賞歸詠孰能無

送吳梅墩倅忠州

巴渝向天際寒浦袂難分帆影破江雪琴心彈峽雲家聲能勿淬  
戶頌定相聞夢裏青城嶠因君就鶴羣

離筵期盡醉劍外滿風霜禹廟江聲古琴臺賦艸荒蠻箋資點筆  
幢布恥爲裳從此賓人舞婆娑爲爾長

刀州分政地花接錦官城并絡星相值郛筒酒任傾棧烟開鳥路  
閣夜響絃聲莫使鄉先達徒專化蜀名

文翁予里人

萬里峨眉月鳴琴對較親還飛玉壺色來照竹林人酒饌樂巴雨

花啼謝豹春雙魚君但寄江畔久垂綸

杜退思夜集退思將之溧陽廣文任

故人難可接言笑肯令稀小雨薄滋竹寒燈深滿扉林閒禽夢貼江煖雁聲微春帳紗應展余思更爾歸

別退思

舷月盈盈憶和簫如今風雨對寒醪春江桃葉嬌迎艣夜閣藜烟煖護毫長蕩湖雲扶腕起三茆峯雪鬪眉高鄭虔豈復悲寥落送爾翻令意興豪

和蕭子寓黃詩稿爲退思所題

蜀國機絲已剪霞新詩又賦白門鴉深杯夜遞匏樽酒小圃春移杜曲花太乙與燈窺脉望門生分隊揖侯芭平津不少嚶鳴侶肯使扶風老絳紗

退思曾分較蜀闌

同張鳴玉方大方吳庸之宗白前之弟酌共得金字

閒園雨後竹烟深朋好同時坐滿林月印霜池開鶴夢語參春氣



坼蘭心篴中尚有匡衡疏橐底曾何陸賈金孤嘯欲騰還自咽蕭蕭羣木已商吟

村居宗白自江上來對雪

禪心融萬象虛谷自相尋指月曙寒水身雲敷定林巖香花雨重雪響錫飛深隨撥諸天食堦前施凍禽

江甸別霜鐘江雲復幾重聲聞入林雪苦秀等崖松鳴磬下巢鳥燃燈窺鉢龍還持印壁意遙叩寶香峯

寶香大龍山峯名

山閣同宗白看雪感舊

寶香峯雪挂林端霽色遙飛艸閣寒隱几還同開士坐憑欄不異隔年看報更栖鳥仍啼竹竊法馴猿又傍壇飲啄共悲無定寓霜葵聊復耐盤飧

至日雪後長子叔攜酒見過同衡之兄賦

雪淨陽廻葭管新攜觴還共竹林人谷雲漸煖吹邊律山酒能香

漉後巾無恙  
薜蘿閒歲月同源雞犬望音塵  
阿咸更預椒花頌  
南舍來分爛熳春

余自甲子春深耕鳩嶺一官再起七十日捧檄歸矣流言蜚  
及里中文學耆舊走臺爲白三代倘存余飲羽如飴也詩  
以志感

孤臣下土麗重明肯信浮雲蔽日成  
綿叢幸存周禮樂顧厨還謝  
漢公卿但無裘馬驕仁里豈有詩書副  
旦評攬得衆芳勝內美巫咸堪與托平生

艸木方依帝日長  
中山篋亦到柴桑瀕年出處隣農記是處詩篇  
野衲藏任有流言同巷伯幸多耆舊似襄陽  
高天視聽須公等燕地何煩六月霜

汪君酬光含萬長子叔集集團得髯字

夏木秀庭色朋樽藉此淹移燈棋肯恕聽雨酒難廉  
笑岸燈前幘

吟搜斷後髻高譚與幽意是會侈能兼

江上同豹叔前之送王爾翼北上

蘆中烟火久能分旋采芳離一送君篋艸高攜天柱雪杯香閒醉  
石門雲江晴鳬影摩空起柳複鶯啼繞岸聞別後秋坪明月滿應  
從池水辨星文

夏夜集殷眉原光含萬篁裏得開字

野徑隱深竹同人不厭來情閒能感月雨後復臨苔杯曙燈花脫  
林喧鳥夢開婆娑今夕意幸不負蒿萊

送顏祥止閩遊即起居家樵川公

長夏清陰滿竹林扁舟送爾思何深水花風起香盈棹月樹猿啼  
夢入琴長缺豈令彈客舍枯棋還與賭山陰公餘倘問胡奴狀池  
艸爲言未陸沉

宗白讀書應化菴寄憶



青峯隱隱但聞鐘  
雲外孤筇未易逢  
盡日經行空翠裏  
一春調息雨聲中  
林花欲曙爭鳴鳥  
江氣初開報飲虹  
逋客朝昏興如此  
買山還擬就支公

改築集園詩六章

貧居托意深  
考室就南林  
戶不登凡鳥  
栖寧後衆禽  
孤琴弄江月  
嘉樹結秋陰  
但預先賢達  
沉冥未可尋  
柴門閉深艸  
車馬更何喧  
雞學山翁祝  
蟬從弟子翻  
陰晴覘井氣  
山水媚琴言  
底事桃花峴  
勞勞問瀑源

清音引玄對  
豈曰好樓居  
華月夜親夢  
高雲晴覆書  
遺身憐艸木  
生計佞樵漁  
但有羅門雀  
朝昏幸不疎

兀傲寄東牆  
陶然世慮忘  
鳩扶藜杖穩  
蝶戲綵衣香  
抱甕貪澆圃  
開帘習賣漿  
閒情課幽事  
白日爲余長

閒看少微星  
秋清映艸亭  
持螯資獨拍  
相鶴展遺經  
竹翠沾巾履

桐陰擾戶庭此時長嘯動山月若爲聽

高情無刺促小閣領清芬月湧千燈堦霞敷十賚文塢深花失曙  
林迴葉留暝不識羊求侶誰來就白雲

余谷王貽詩見訊兼有藤杖之惠期以登高入城依韵報之  
遯栖凡鳥題誰至惟有孤蟬咽露條叢桂薄能招小隱芳蘭焉敢  
副離騷鵲中升月明煙樹鵬下垂雲映雪濤此際海門秋已壯杖  
藜何必待登高

壽游郡伯羽儀

秋清斗畔現長庚燦燦偏從郡閣明豈但文翁能剖竹更聞仙吏  
善吹笙江干墜雨覘龍見天柱皐霜引鶴鳴九鯉知君鄉夢遶

蒲田人

功成重踐赤松盟

水衡無藝急追呼正是新分皖國符燕雀依然聞賀厦牛羊深藉  
與求葛征輸恥問桑弘策條上還爲鄭俠圖只此謳歌元勿替海

羽儀

籌况復值懸弧

杜于皇自臨臯省其尊人于漂陽儒署見訪賦贈

瀨水白雲稠輕操負米舟因攜雪堂月爲破竹林幽星彩眉分現  
寒香詠與收蟠胸渾鳥篆詩禮復何仇

預爾趨庭日文梁益楚材侯芭重問字驥子共銜杯寒水鳴還戲  
高臺鳳未迴遙知吟眺際燦燦筆花開

至後吳栗仲過訪感懷即柬曹元甫同年

舟居非水尙堪乘蠶室今將並寢興謝諫當杯容皓月虞翻獻弔  
擬青蠅筇聲賴響空林雪線日初臨大壑水樽酒論餘因共笑橐  
籬海內幾人曾

雪後戴德充過訪惠以製畫并訂黃山遊

安道翻爲乘興遊竹林殘雪似孤舟手攜尺素展靈嶽臥聽高壑  
懸春流葉煖啼烟無倦鳥江晴媚水有恬鷗與君且醉芳樽酒黃



海雲濤取次酬

謝耳伯門人陳不盈以詩見投止飲

謝家玉樹未凋傷之子康成預古狂  
閩嶠夜猿同抱月吳洲春雁正啼霜  
孩鐘寄夢惟蕭寺細雨銜杯向草堂  
更剪青燈映華句座中先發蕙蘭香

趙侍御二瞻過訪俶園留飲

連城寶氣燭江東嶠鹿汀鷗望澤同  
篋滿茂陵園上艸轡澄司隸漢家驄  
短牆古柳颺危碧水檻孤花綴小紅  
還借莫愁湖畔月光依舊照詩筒

用韻答陳潛山蝶菴見贈

天柱春雲暎道南辛盤生菜與同甘  
藜分太乙烟相織花割河陽露並酣  
雞肋都忘三見已鷗羣未覺七難堪  
剪燈細品千秋雪稷下應無此夕譚

鳳雀封中戾羽勤山書小篆紀神君五絲蜀錦臻華製一擲胡琴  
領艷聞晴嶠白從危雪吐春杯碧爲小香分吟餘仙影無烟火碎  
翦巫山寸寸雲

壽游覺之六十

招隱亦奚事栖眞君自偏商坪芝莢紫蜀閣艸紋玄春永禽魚曆  
靈吹几杖烟婆婆閱蟠木未足喻長年

林六長自嶺南來見訪并訂往浮渡看石蓮

芳艸候將歇君來情更飛聞猿下廬嶽警雀過山扉篋抱羅浮雪  
香綿薜荔衣石蓮頻有約觴咏詎令違

答賈方伯孔瀾

涕笑何途是時清事逾危民生那可道眞宰甚難窺松閣無凡籟  
烟江有舊絲余心誠匪石持以慰相思

寄懷葉震隱同年分憲楚中

心魂碧何際艸色滿瀟湘質古離憂合懷人夢路長  
濃花蒸鳥戶暄水飲魚梁何日尋奇服歌中警楚狂

朱薏將粉堞無恙庾公樓古意寓明月清吟謝審修登魚青玉案  
次鳥白蘋洲安得騎黃鶴扳烟縱遠遊

齊价人以祐聖觀賦詩相正依韵賦答

結制玄都觀能無羽節逢步櫺動江色複道蘊天風  
化杖龍騰澤調笙鶴語空艸玄衣更白此意可參同

喜李烟客嶺南來見訪

微尙君應省門蒿色已腴禽魚能竊傲艸木共臻愚  
鶴上追煙駕鯤間弄海珠五年乖飲啄夢路復何殊

方聖羽四十初度

江流何浩蕩朝夕展烟雲結室蛟臺上讀書遙羨君  
風林寒海月石瀨飲霞文九子多來鶴瑤笙試可聞



昭世無迷寶兼君仕已彊聚螢光定滿牧豕徑從荒秋水資風擊  
天香挾露翔上林聞獻賦吾亦發吾狂

送諸門人應試南中

揣摩君各就知不媿功名蛟雨馮河至鵬風鼓翮輕詩書炊汲具  
忠孝婉變情持此酬當世余何負耦耕  
孝陵秋樹裏曾拜鼎湖弓自隔漁樵夢欣君蹈舞同獵聲雲夢接  
花路曲江通諷諫還裁賦長楊正射熊

送何不毀還閩

閩嶠秋雲裏猿聲無盡時君歸芳艸後復接桂香期屢外天風縱  
樽間海月危高吟動河漢於此寄相思

寄懷謫居友人

淮水浩以深維魚則有魴旣殖秋菊英載颺叢桂芳君子賦離居  
茲焉三載長玄亭維寂寞頭責何悲涼天道匪難明其微亦孔彰

直北盛風煙擊鼓何鏜鏜  
蒼蔽通衢駿逝臺且荒雲龍既有筵  
野鶴安得翔所以明王夢旦夕鬱其光釋以衣繡懼授以蘭蕙  
要識天地仁雷雨非不臧人生可憐蟲少樂多憂傷無地無遺蔽  
安用懷梓桑王孫有遺緡弄之秋水香暇則治玄言邃古開迷茫  
皖口去長淮葭莢天各方相悅在縞素相贈無月璫秋近河氣白  
素琴爲君張清商颯然來襟袖咸有霜萬象澄遠心海月懸青蒼  
吳子遠遊姑蘇旋金陵應試書至賦答

君行閱吳會耳目有清娛延賞峯能秀臻情月詎孤狄香紛呖澹  
綺意到樵蘇古樂知誰在重爲問訊無  
高館臨蟲夕閒琴爲爾開夢乘梁月往書度橘烟來鹿野賓筵展  
鴈風獵騎催秋聲動雲夢賦獻復何猜

泊荻港東方都閩龍望

詞賦絲來重兩都時危笑擲出關繻燕臺已市千金骨虎子能彎

五石弧月幕吹笳臨畫戟秋舲擊汰動寒菰東來烽火騰新警片石祁連未遣孤

遲侍御之來招飲賦謝

江甸長敦石戶耕鴟夷閒問五湖行澄清藉有神君斧歌咏爭傳孺子纓月皎山精聞夜泣風暄煙鳥弄春聲杖藜乘暇趨公府咨度彌深忬軸情

納姬金陵客久有懷諸兄弟

壺觴已謝永和期林竹清陰入夢思幽操徵蘭出誰谷晴欄鬪鴨就何池江春花散霏微雪岸雨楊垂宛轉絲此際支頤看岫色遙青眞復似修眉

壽陶擎玉偕配六十

家世華陽陶隱居鹿門不羨曳霞裾東方曼倩狂遺肉南嶽夫人笑授書牛渚映簾琴詎默青山延屐酒難疎佳兒儼伋方逾勝掇



得天香漾板輿

登蛾眉亭

秋磯殊靜立風水任乖違  
顚視見盤鷺狂歌酬落暉  
雲松固無恙英爽誓來歸  
夜聽空江響華鯨似欲飛

鑿江舟中喜劉爾敬慧玉叔姪至

懷情入秋夕葭菼路何深  
飲月魚龍氣栖煙鴻雁心  
抱珠輝夜壑採藥待春岑  
作達吾能預浮家卽竹林

水霧寒逾盛三山望若浮  
孤帆亂秋葉微雨質江鷗  
巾翠松烟鷺琴香橘露稠  
餘生追荷鍤搖落定無愁

舟中初度口占

鷗夷聊謝市朝塵笠雨竿煙與夢親  
桂樹久遵招隱地茱萸長媚攬揆辰  
昂秋野鶴盤浮嶼淩月江妃步廣津  
更有紫衣欣薦篴孤源那復憶秦民

眞州晤馬侍御千里感賦

立仗同聽禁苑鐘別來音旨甚疎慵  
友聲黃鳥時鳴葉無恙青山未限筇  
秋嶠石蓮鄉夢遠江籬露菊晚香濃  
與君但醉樽中酒漠漠遙看天外鴻

祝勉之孫益仲見訪止飲小園

江雲靄靄客何來蓬戶荆扉爲爾開  
白石幾人聞叩角青山到眼且銜杯  
詩書詎忍微言絕農圃難令遁思迴  
世事祇今堪共笑濠魚林鶴倘無猜

壽蔣二陵六十

江清遙見少微星古徑春風拂艸亭  
種杏已成林盡綺殮芝恆足髮何青  
弟兄茅氏丹臺隸翁媼龐家白業靈  
市罷壺閒貪數息泥丸終夕諷黃庭

飲方良一文學閣上

櫻花橘刺接牆東一徑羊求更許通  
深巷書聲紅燭下小樓山色翠微中  
開簾往往遲歸燕飲研垂垂見渴虹  
桂子銀蟾秋欲白與君高詠向寒空

栖霞月夜示恒覺

敬此寒山月偏輝祇樹林已知塵夢格  
彌使道心深曙壑流香水昭煙響聖禽  
還思峯盡處天樂繞光音

出攝山

家寄青山曲朝昏禮嶽雲寧知此巖壑  
終古蓄靈芬珍艸霜難弱蒼松翠莫分  
誓當花吐候重就鹿王羣

賀徐侍御夢麟公子捷黔闈

臺柏森森帶古霜桂叢近復發天香  
檄傳筇屨焚千軍廢路入淮淝一騎長  
豈第石麟聞抱送更瞻金馬待廻翔  
少年同舍狂如昨大斗爲君乞酒漿



女史顧眉生善畫與曹子玉甚歡賦贈

蛾眉亦與虎頭癡  
蘭蕙心情秋水姿  
欲倩風流京兆筆  
爲圖花睡未醒時

久客還山堂

不到茅齋久  
深憐湖海蹤  
石霞無淺色  
晚藥有豐容  
對酒山仍冶  
延琴月更濃  
所欣初服在  
能勿滓松風

答張澹士見訪

艸色眷閒門  
斯焉微尙存  
端居治奇服  
嘉遯托山樽  
徑闢朝霞氣  
梁延古月痕  
知君玄已預  
剝啄更何言

兀傲琴書在  
青山道詎孤  
辟辭三語久  
吟就四愁無  
楚鳳衰應起  
湘靈怨亦徂  
農臣看整暇  
開曉待蘼蕪

送陳葵若入吳訪周司理五溪

客路入菰蔣  
秋花繞夢香  
故人官似鶴  
幸舍食爲魴  
海鷺雲霞色

山招橘柚霜伯鸞無恙否煩一酌寒荒

書訊姚侍御心甫

罪言何謦謦共譽補天心一問豺當道寧慙鶴在陰孤情華月曙  
幽夢晚香深偶影秋籬下因君發楚吟

秋雨同方聖羽夜酌兼閱其含山館中近撰

秋雨鬱暄中朋來更此晨永言遵古處遺跡長農臣載露蒹葭厚  
開香橘柚新滄浪審何在不敢漫垂綸

禮樂憶君東山泉發幾蒙高文矜曙色清思壓松風偶影秋燈下  
深談夜雨中閒琴雜涼吹于此意無窮

計無否理石兼閱其詩

無否東南秀其人即幽石一起江山寤獨翫煙霞格縮地自瀛壺  
移情就寒碧精衛服麾呼祖龍遜鞭策有時理清咏秋蘭吐芳澤  
靜意瑩心神逸響越疇昔露坐蟲聲間與君共閒夕弄琴復銜觴

悠然林月白

寄懷王東鄉石雲

天柱有仙雲飛作南州雨美錦卽孫襄英聲著韶護能令野雉馴  
不遣衆狙怒陽鱗跡斯歛桃李花延樹琴月一何清甌塵豈辭屢  
大國已烹鮮明廷會充鷺秋色淨江天霞端覲孤鶩蒹葭弄遠風  
芙蓉被華露颺思及中央宛與伊人遇采蘭折疏麻貽之見情愫

山居憶豹叔

山籬閒採菊寤寐切夫君藥晚選華露松窗哦靜雲慵陳高士榻  
恥應少微文自向圖書藪悠然爲接芬

送汪用章還楚

旅思何寥落寒山江上開抱琴難得意掛席且歸來綺季芝堪摘  
岑牟服好裁無情湘水綠莫擲楚臣哀

答吳子遠見訪



屏居何所事疏益有同人浚谷如開曙蘭言已載春定文冰雪在  
謀野鼓鐘陳天祿多遺帙藜煙待爾新

閒心事遐矚梁甫奈愁何賴有羣賢哲能操利斧柯靈淵蓄龍性  
清夜縱牛歌燦燦瞻珠樹欣余備蔦蘿

雪夜山酌用損之韵

山雪延未已田野饒所侵相共展寒杯素月亦翔林兼以霜露光  
靜照幽蘭襟子和余復歌清響如秋琴何必援枯桐彈之寫我心  
歲暮柬謝明府修吉

歲火祠燈戶戶譁江鄉節物亦繁嘉從知邑有鳴琴宰遂使村無  
覆釜家高閣梅英颺樹色深宵柏液引杯霞印牀琴匣春風裏手  
濯清泉灌舊花

送周子久還治父

晚晚何堪送子行荒原殘雪照孤征還家綵勝應題燕隔歲提壺

好聽鶯治父春山關涕笑清齋秋水謝眉情勞歌自哂終成誤長  
嘯應爲楚鳳聲

癸酉元日

高臥遽遽物外身巖居不問歲符新梵鐘遙報青門曙竹里欣違  
紫陌塵梅柳定爲春酒放兩暘好向老農勻山雲旦旦多佳氣絢  
素何煩太史陳

楊守戎子儀失職寓蕪湖以書相訊感舊賦寄

去年此夕泊江村尙憶林香入酒樽亭艸已開吟思秀檣燈還避  
劍花繁芙蓉久歇空洲采蕙以重銜瘴海冤書至愁隨春水闊蕭  
條旅饑念王孫

淮海舟行留歌兒子湖陰奏伎

江南春欲半汝往預鶯歌不共揚州夢其如芳艸何卷衣箏語細  
垂手舞風和莫整優旃調愁思動綺羅

平等菴同閣生明府周子久宗白夜話

水聲連笑語清響詎能分  
遂覺指標月不知身卽雲  
縣花天際雨  
林竹定中芬底事歸飛鶴  
勞歌使世聞

龔直指瞻鳳過訪俶園留飲

月旦曾聞艷汝陽  
至今遺愛滿耕桑  
衣冠共識桐鄉壘  
劍履高飛柏府霜  
漢檻不新存骨鯁  
堯堦有影避神羊  
絲來治行推華胄  
渤海遙承姓字香

榆塞星飛鍊騎塵  
漁陽烽火燭通津  
孤城掘伐寧遺鼠  
高閣嵯峨好畫麟  
期會萬方還禹貢  
賢勞率土冠王臣  
簡書正及桃花水  
瓊子無聞有負薪

訊超乘上人自江南移錫寶善菴禁足

禪蹤復何繫  
杯渡隔江山  
座下土花秀  
燈前秋樹閒  
觀心空水際  
施法百蟲間  
曙盡高峯月  
知君一破顏



答蜀僧談佶以詩見投

炎齋茗粥特生寒似有千秋雪未殘  
玉戲宛從光相吐朱門竟作  
薜蘿看山猿媚月爭啼嘯江鶴驕霜弄羽翰  
何異青城與巫峽禪  
心着處倘能安

壽王方伯梅和

銅雀秋來禾黍鳴江鄉歌咏滿西成  
况逢嵩嶽生申甫並衍河汾  
到鎬京幕近天都仙樂下家隣碣石海雲平  
功高倘及收雷雨黃  
髮從容問穀城

藜杖深蟠化日煙華封祝罷饗鈞天吹笙月嶺人如鶴擁楫春江  
曲自僊九子曙霞高建隼三茅香雨靜調絃醪醑碧更同秋浦綵  
服看觴阿母前

送瞿遊擊劍灘歸楚

楚州橘柚醉晴煙將子分攜欲黯然身隱何嫌逢醉尉功存誰與

念飛鳶征塵不挂岑牟服釣艇何如下瀨船別後君山望秋色洞庭碧月好娟娟

宴汪中翰士衡園亭

大隱辭金馬多君撰薜蘿聖遊賓漠野倒景燭滄波慮澹煙雲靜居閒涕笑和鸞情復何極高詠出層阿

桃源竟何處將以入青雲衆雨傳花氣輕霞射水文巖深虹彩駐淀靜芷香紛詎遣漁舸至靈奇使世聞

神工開絕島哲匠理清音一起青山寤彌生隱者心墨池延鵲浴風篠洩猿吟幽意憑誰取看余鳴素琴

縮地美東南壺天事盍簪水燈行竊月魚沫或蒸嵐自冠通人旨慵教尙子諳祇應佩芳艸容與尙江潭

阻風清谿慰仲立公穆

心賞寄中洲誰云旅泊愁羣峯延浩翠一氣與浮漚奏月水蟲語

開香橘樹秋朋樽歡此際鮭菜亦何求

虞學憲來初築園甚適招余泊元甫往遊先之詩

離居晚歲悵瑤華避地從君水一涯  
質研手疏蘭蕙畹登高人問  
杜鵑花渚田秋煖香通雁月樹宵沉  
夢繞鴉我自朝歌結知己臨  
風烏帽與欹斜

次采石赴元甫東遊之約先詩爲趣

水國菰蒲候扁舟事轉蓬人煙湖艸外  
山翠夕陽中鱸膾思疑淺  
鷗夷汎易窮好將遠遊意揮手謝飄風

京口江行

如此山川靜揚舲客思閒天開葭莢路  
秋貼雁鴻間水霧孤帆飲  
煙霜獨鳥扳何從感搖落蕭瑟賦江關

泊丹陽先柬來初學憲

秋燈恬客思夢路入清都是地仙雲  
匯兼君高尙殊寒塘魚自賸



宿莽雁相娛持此招黃綺青山勝所通

靜會成連旨孤琴詎浪尋閒猿懷嶠切夕鳥就煙深媚屐山當廡  
延樽月在林投無君無異物狂嘯與清吟

題虞來初豫園八首

秋水問扁舟同心耐遠遊褰裳臨汐社頓轡望椒丘露被芙蓉坂  
天開雁鷺洲將君敦晚節雞黍并非謀

幽尋嘉遜地應接倍山陰浪豁海僮語岑孤木客吟居然萬里勢  
其獲五湖心寢食仙源裏栖栖笑尙禽

衆香通井竈虛碧漾池軒聊徙庭中藥如窮雲外村魚風吹荻浦  
鵲月挂松門此際悠然意誰能負一樽

達人事高尙安有不忘機閒意覘僮僕空香飲戶扉鱸靈能應釣  
鶴慣且銜衣卽此肆愉悅何煩問是非

層楹頽脩木履下湧仙雲海日當窗曙天風入夢聞豈徒凌梓澤

詎屑禮節君秋駕馮無極元龍未敢羣

山亭通石瀨涕笑入清虛香閣流晨梵花潭喧夜漁風鳴午橋竹  
雲逗酉山書持此睨千古巢由謝不如

何處逢搖落秋林清且嘉載花移小艇盤馬藉晴沙撥煖閒魚鬪  
煙豐夕鳥譁飲君霞上緒萍梗失天涯

花源娛信宿塵海幾廻平梁月窺移榻峯霞接耦耕鳴琴幽篠動  
合椀石泉清再覲防迷誤因留爛斧名

贈顧生

生能度曲

秋林求友尙聞鶯宛宛蘇門起嘯聲吹夢蝶邦傳浩笑啼花蟲戶  
理幽鳴高城落葉微風度孤嶼寒潮薄暮生此際負薪誰復耐煩  
君一寫楚臣情

雨中赴吳充符招二首充符坐中出黃子久長江圖一卷蓋  
爲倪元鎮十年撰就古人持誼居心不苟乃爾充符珍此

良有深意

旅情誰與制寒雨復孤舟賴有高丘集能開野泊愁蘿琴喧古雪  
花笈斂滄洲持此驕禽向吾生已聖遊  
散帙煙嵐動靈槎近可尋洪流千里勢舊雨十年心侶有猿啼峽  
如看月印林衆山羣薦響不藉少文琴

羅繡銘張元秋從采石汎舟眞州相訪遂寤園小酌

蹇采滯荒洲朋來暄薄遊揚舲追李郭借徑禮羊求碧飲寒潮埠  
霞舒絕嶋樓靈氛識何在縹馬問椒丘  
岫斂峨眉月波開牛渚光荷纓心自苦蘭枻興何長野色碧寒楚  
江峯翠夕陽山杯喧衆嫖一壓步兵狂

淮海舟行感所見

蕭晨浮澤國極目感心魂湖白幾羣鳥煙青何處村殘籬通水霧  
高樹挂潮痕民事嗟勞止離憂未敢論



魚龍連野哭烽火滿車書飲羽亦何補乘桴安所如勞歌傳艸木  
遺子入樵漁天運迨陰雨言燮理疎

抵高郵徐水部準明以治水出卽放舟至淮上

一寒頽月氣衆葉酌風聲況急嚴城柝難爲旅泊情星通簔簷路  
霜刻雁鴻程且問淮陰釣清流共濯纓

客眞州范蠡卿太蒙枉存賦謝

風義夙相親班荆慰此晨賓雲多逸駕媚澤有修綸寒雨飲袍色  
霜花凝甌塵廣陵遺散在聞罷各霑巾  
浮雲觀往事賢者每貞艱拮拾幾莖粟沉冥累月顏盟心共寒水  
問道指青山祇恐蒲車至先憂未可閒

答前之弟詩訊

久客通音旨家園亦當歸跡終慚浪梗夢詎隔山扉煙暝禽逾貼  
霜深魚更肥遙知林下集應念芰荷衣

廣陵納姬自賦催妝四首

瓊花深處鬱蟠根  
雪暈香跗與笑痕  
凍雀飛飛還小却  
獨遮鶯語到黃昏

鶴氅逍遙舊侍臣  
口脂面藥澤如新  
茂陵近艸封禪罷  
小贈妝前點絳人

黃姑河畔理星車  
詎說春絲綰若耶  
絕勝舊時門巷在  
香風小立博陵花

小洞流雲香滿山  
持筐採藥憺忘還  
歌來桃葉嬌如許  
更在茱萸第幾灣

歲晏喜潘木公錢無可渡江相訪

孤舟斂寒雨客思與誰裁  
賴有高朋展能衝  
夕鳥來杯隣將泛柏  
語圻小香梅試共拏  
洲莽昏江汐未猜

離合關吾道何矜雞黍名  
青山諳古處芳艸質平生  
飲月開魚夢

啼霜刷雁情靈修如不謝還與泛霓旌

朱中丞明京書訊賦謝

孤山勞極目冰雪路從荒旅雁求聲至停雲結夢長起居申野寤  
音旨泄巖芳共枕寒江汐離憂未忍忘

時事乃如此東山臥詎安園棋罷閒墅麾羽副高壇人競尊東袞  
天霽抑渭竿海陵星隱地早晚鶴書蟠

寄李季重大參分臬荊楚

季重濟南人曾守姑孰

隼旟楚塞矚高騫尙有青山載舊恩江渚靈光留水族墓田香雨  
飲芳蓀部連巫峽雲侵夢客憶平原酒滿尊是地從來瞻詞賦衆  
芳煩爲斂騷魂

大國雄風曳海瀾詞場岌業領危冠聲名香遍封君橘寤寐幽通  
公子蘭秋水龍門望天上江村犢鼻掛林端何期撰罷登樓賦就  
爾狂歌行路難



王梅和使君督運北行便還滄洲遙賦帆園之勝兼以志別  
名園卜築瞰澄瀛藥碗芝房次第成徑有簣簞留嘯處棹聞桃葉  
和歌聲岫從碣石雲長戲樓對津門月細生鶴唳翛然自冰雪滄  
浪寧藉濯華纓

九子春雲繞接羅閒情遙與碧蘿期爲監天府牙檣粟慙賭山陰  
艸墅棋竹里長宜明月照蘭亭未許永和私懸知斗酒陶然後定  
憶江南似習池

謝羅穉白假寓秦淮納姬

桃葉春新碧未驕青溪溪畔欲通潮賴分珠樹栖雙燕直上瓊臺  
引洞簫無氣可容關尹卜有期還勝竹林招石頭亦有羅含宅楚  
水江魚味不遙

雨中集黃若木殷徵卿潘木公楊龍友水閣小飲

小雨閣春暄朋來理晤言閒情貪浴鵲高論感潛鯤陸海津何在

文園艸幸存華余睠龍德斗石敢留髡  
謀野夫何獲琴樽領一閒申談衍華燭托寤與青山楚鳳收衰德  
湘漁濯悴顏糟丘藉徒侶盡日有躋攀

俞駕部仲茅招集爰爰園并讀其園解有賦

罪言思往事問夜耿深情折檻動明主題門勞友生濯纓春水漲  
照酒夕花明更讀名園解千巖領笑聲  
君子誠龍德其居宛兔園烟嵐入規畫樹石競森尊花密攢禽語  
波寬漏瀑源翻嗤沂水曲童冠詠歌繁

答閔士行韓姬命林若撫六長見訪

負薪行旦旦慷慨孰爲歌流目春無際羈人愁奈何芳洲煙眷艸  
佳夕月開蘿衆嫵情無極華予睇笑和  
冶城占寶氣數子亂春星高飲敵溪雨羣吟香艸亭室長延夜白  
夢亦繞山青奇服咸能理應來叩獨醒

謝郭侍御丹葵招飲

家聲有道擅冲融，美錦姑溪製久工。  
子夜柏臺鳴露鶴，春流桃葉飲花驄。  
青雲高翮瞻逾近，白石勞歌咏未窮。  
旦夕江鄉資攬轡，舊棠重爲領清風。

壽彭錫天配史孺人四十

仙壇琪樹未荒蕪，雞犬花源近可呼。  
弄玉綵雲元並史，彭郎霞嶼更連姑。  
五噫歌擬從鴻隱，三徙居能課鳳雛。  
豈第斯皇誇薏服，紫泥還與濯侏儒。

上巳趙二瞻郭丹葵二侍御招飲莫愁湖

春湖蕙芷氣初勻，撰酌何期共隱淪。  
柏府華簪雲外盍，蘭亭逸爵水邊親。  
霞紋高飲連城璧，花氣爭香折角巾。  
纓上更無塵可濯，歸途煙月導清真。

贈崔都閫元愷



江柳細翻風春生白羽中星文花讓劍玉靶月臨弓小吏繻纔棄  
名王帳擬空平生酬國意今日藉君雄

憶與論奇日咿唔陋一經下帷藜火白飲羽石花青繡虎無淹步  
霜鵬有健翎爲君懸綵筆高勒柱間銘

三月十五夜客秦淮聽女史李澹生度曲並奏絲竹諸技六  
代風流空餘烟艸莫愁桃葉賴此香魂當不寂寞也遂作  
詩

月亦如期會清輝逗此宵香聲啼玉鳳花頰印紅潮旣擘阮咸阮  
還吹簫史簫憐君魂是水雲雨不堪招

雨中宿祠山道院嚴羽士房

鶴嶠星壇路未荒爲參睡譜到芝房縹瓷靜夜醉花露雨後滿庭  
春艸香

雨泊姑孰同徵卿搏仲益仲肅應舟中小酌

春溪飲繁雨萬象森一碧孤舟若在夢搖搖乘廣汐眺聽亦何閒  
汎覽謝疇昔花暝鷗路荒藻邃魚情適羣潦悅深江悠香寫平澤  
率此太古心復共遠遊客所取洵有然琴樽永茲夕

謝王方伯梅和招飲芝墩

幕府梧寒月氣森杖藜野服一招尋燈前紅燭侑兒舞水曲青菰  
孺子吟笞簪路開魚在藻蒹葭烟盡鵲遵林醉歸忘却栖帆地惟  
覺澄香橘露深

壽密觀上人六十

般若絲來陋大還光音聊爾現人間禪心白淨蓮花露僧臘青綿  
壽者山自結妙鬘長陰體偶拈簷苟一開顏與師巖下栽松子直  
待龍鱗共掩關

歲暮同衷朴訪過日卿山甫村居見留聞時事有感

雪霽寒山山氣悠晴林鳥語亦堪求風霜共牧平津豕燈火重縫

季子裘羗管淒其吹夜月楚香零落滿滄洲與君盡醉粉榆社梁甫岩曉未敢愁

歲盡得袁公寥書賦答

山扉團野雪偃臥憶君同艸木托微尙琴樽敦素風谷暄春尙在花發夢難空試騁晴川目江雲不可窮

垂手釣霜魚加飡報起居秫香彭澤酒花媚武陵漁種藥畦無恙趨林鳥未疎吾生太憔悴君尙近何如

禊日赴曹元甫同年九子江之期

春風吹雨滿平蕪此際琴樽興未孤大澤各安黃鵠隱浮家輕與白鷗俱文章海內爭相避松菊年來葺也無名嶽幾時承十賚誓隨靈壽爨彫胡

永和逸興幾曾闌芳月同人更浴蘭星駕空占賢者聚雪航不耐子猷寒薄移煙艇江山麗小酌滄洲禮數寬莫向靈均竊詞賦杯



前蘅杜已漫漫

千載心期問謫仙  
春江花月照青蓮  
憐余久挂岑牟服  
就爾遙牽孺子船  
綰帶豈令慙惡候  
求聲更喜在鶯先  
西園賓客稱嘉會  
征蓋誰凌九子烟

大陸風波未敢論  
鴟夷且盡手中樽  
鶯花豈爲閒情繫  
雞黍將無古道存  
春淀詞人歡命褰  
星橋貴邸奉留髡  
廿年裘馬同回首  
寒浦蕭蕭落雁痕

止宿瑕仲新築山館贈諸令嗣

磬地榻相分  
芝蘭果接薰  
綺心融艸木  
寥目極星文  
下食人龍滿  
鳴皋子鶴聞  
仲容何足器  
瞻爾入青雲

舟次別元甫

江柳正依依  
江帆又背飛  
烟深餘夢入  
艸綠與心微  
閣飲羣山氣  
林尊片月輝  
思君共蘿薜  
懷尙豈應違

江舟有懷吳明府闇生兼訂石巢之遊

江甸春深艸不微，片帆輕共柳花飛。  
風塵滿地此何適，絃誦于今知有歸。  
琴月夜張池蛤靜，署烟朝冷饌魚稀。  
公餘清興懸難淺，石塢先期敞竹扉。

平等菴落成過訪宗白

遠公開社就何雲，竹翠嵐光更不分。  
林月靜標方丈曙，池蓮常報六時芬。  
掌中撥食容禽繞，座下敷花藉鹿羣。  
笑我塵間留滯相，風泉還與別聲聞。

大方讀書門山同前之弟過訪

何地托琴樽，循雲臥石門。  
御冬諳梵制，展帙報親恩。  
林定納泉響，山寒識翠尊。  
悠然雞黍意，古處爲君存。

張若仲久客閩至皖卽趣其還楚

南斗劍長留，經年歸楚舟。  
海霞情自曙，巫雨夢還稠。  
積句滿山葉，

還家如旅遊高堂倚門切負米莫悠悠

客心何所寓嵐翠與灘聲書就石倉讀琴攜竹署鳴湖香菰米熟  
洲暗橘花榮此際南陔思知君倍有生

周元修歸自汝上秦京寒水園過訪

寒水綠波柔君歸江上舟旅程記春艸高詠失鄉愁又作浮鷗計  
來尋野鶴儔因之理瑤瑟林月共悠悠

剝啄恬門雀知余隱意安中厨傾美酒長日縱清歡琴補風榛寂  
燈閒月樹殘竹齋茲夜枕爲爾夢逾寬

長門怨

螢心微可察幽視倍含情綃幕暎如空瑤堦秋共生葉流砌苔響  
月上網塵明此際肝腸結誰能長嘆聲

雨後郊行柬吳明府闡生

好雨酬農月川途亦洒然水平春圳隱雲洗夏峯鮮動植情皆獲



朝昏計更偏田歌聊自豫卽此政聲傳

雨夜同金任夫懶鶴清隱上人小集

江南餘杜芷歸我以平生雨夜遂深酌高齋彌古情  
茲傳孤雪味語亂百蟲聲何事將浮海閒琴自可鳴

劉胤平使楚還移酌俶園賦謝

巖曲枉朝英蓬中駟馬鳴玉堦移艸色宮樹與鶯聲  
星石先槎至羹梅接幄成因君問蘿薜翻切野人情

無可賦離憂閒園林樹幽林喧求友鳥池獻濯纓  
流月認琴軒吐涼憑酒幔收敢將仲長意寂寞謝巢繇

答宗白搆平等菴見寄

結宇出桃源因辭雞犬喧雜雲多古翠司月有閒猿  
珠繫嫌衣重蓮開笑漏繁看君持半偈晏息向祇園

喜宗白入城修等社得羣字

空際相靈氛孤飛錫已聞磳香遺徑艸庭樹染峯雲月不分天曙  
蓮寧擇水芬煩師持等義還慰鹿麋羣

飲徐介白

春艸先疏夢江雲難限心如今高士榻展在阮家林震澤潮通壑  
寒山月吐岑中厨繕茗粥深樹一開襟

初社喜闇生明府偶過得蘿字

勝侶結巖阿閒情領嘯歌山公會乘興池上更鳴珂香翠酣林竹  
清真薦茗柯坐深鳧欲舉留賞駐煙蘿

茲園同社彥再集盛唐樓得山字呈從祖樵川公

茲文未墜竟何傳識在淵龍仞鳳間歸日求羊循徑戶昔時枚馬  
此河山林開麗景騰虹上檻繞洪流望海還爲報漢遊羣扈從封  
成何賦著江關

西一上人自匡廬見訪茗集

小徑合蘿陰羊求亦費尋響山琴裏籟啼翠竹邊禽遂過孤峯客  
來參深艸心如何古溪笑隨月入幽林

方坦菴過集園話舊感賦

繞徑野雲稠軒車爲破幽霞高孤鳥逝月至百蟲求巖戶空香冑  
宵燈靜語流淩君多古意雞黍詎堪留  
林竹領清狂因君理月觴語還參布被衣已雜宮香飲雨魚梁近  
開雲鶴路長所欣情具勝出處各芬芳

謝喬大參鳴墀見訊

世事元如此浮名安可賢蘿庭無淺月竹塢有流煙露語蟲臨夕  
霜聲鶴在天思君正雲臥此興亦能偏  
水壑春難閉雙魚欣遠存瑤華通寤寐節候謝涼溫梁苑鳴秋竹  
繁臺起嘯魂幾時千里駕重與罄芳樽

溫直指澄虛不見枉以書代訊賦答



寒莎幽篠滿牆東短布岑牟築自工  
徑冷已無堪薤艸秋深安有不飛蓬  
澤分章貢誰能禦嶽動天都未敢雄  
自是清霜羣品肅故人合避使君驄

初服栖遲卽主恩離居未敢賦招魂  
雲蛻尙帥飄風駕薜荔曾無舊雨喧  
鴈汭漁燈然夜浦龍山社鼓響秋村  
樂郊卽墨真堪擬孤躅煩君達帝閣

于時有中吳闔生明府故及之

### 訊大方藥閣兼訂山遊

秋閣晴馮江上峯寒香淡淡集芙蓉  
散巢豈遽辭凡鳥尺木誰堪擾應龍  
山路煙青朝弄屐石林露白夜栖鐘  
與君共肆雲中駕雞犬訾邪未許從

### 王梅和方伯督運旋書訊賦謝

估估戎車洵水東萬方飛輓佐膚公  
漢家粟轉三天上公袞歌騰九戩中  
騎竹秋田喧士女沛乘江路導霓虹  
圃臣于野羣鳬雁樂

歲同矜招拾豐

涼風催葉下空林  
嚶嚶難爲梁甫吟  
宛有疎麻問荒築  
遂臨秋水奏孤琴  
天高九子青霞吐  
雲湧三茅絳羽深  
延竚江潭問江月  
宵寒寧禁鶴鳴陰

齊价人見訪集園止飲

門柳日凋枯  
蕭蕭雀亦無  
奇懷眷冰雪  
高會厭蓴鱸  
葉響矜林靜  
樽喧失月孤  
感君芳艸意  
歡笑向窮途

用韻答胤平見懷卽送其江上還朝

解薛還雲陞  
臣情戀闕深  
曙雞江館夢  
煙鳥故園心  
視艸宮英舞  
鳴珂禁月臨  
因君幽思破  
霄漢入荒吟

巖居答溫直指再訊

栖景向巖阿  
閒杯理嘯歌  
起居付殘帙  
音旨及荒蘿  
星映寒塘艸  
風喧野徑蘿  
餘生微尙在  
終自戀漁蓑

道直寧辭黜，高天鑒自存。  
風霜留弱植，丘壑飲深恩。  
印屐寒林雪，攤書上屋墩。  
何當謝鋤笠，簷隙望高軒。

姑溪雨泊有懷淮海彭城友人

江聲挾雨入孤懷，此夕何堪鴻雁來。  
淮海地卑潮近月，逐臣夢遠雪疑梅。  
煙綿漂母炊魚地，雲接彭城戲馬臺。  
世事物情君自笑，子山空切暮年哀。

興黃玄龍共酌

湖汀煙月細，汭曲土花香。  
盡子移家地，令予結夢長。  
清燈肅良會，醉語壓高霜。  
履跡探橋艸，春深碧未荒。

泊大門寄元甫

別意無持贈，寒香嶼嶼通。  
舟痕開積雪，夢路察飛鴻。  
是地栖帆月，前期對酒峯。  
此情入琴理，莫藉古人同。

江雪憶家園兄弟



天水欲無色何知江雪深帆開洲渚路客領雁鴻心霽帙翻虛幌  
寒樽媚夕林故園吟賞意此際入孤琴

雪後泊清谿月中有懷宗白

旅情隨雁入目盡暮雲端賴有孤峯月來同野泊寒枝燈曙深壑  
高雪寄危巒此際清谿夢遙心向爾安

依韵答劉孝廉觀欵見訪即送其北上

觀欵彭澤人

煙蘿寒鳥滿閒園冰雪能來步履痕夜氣光煩推象緯春恩香欲  
動蘭蓀柴桑漸與山雲別天祿高瞻閣火存巖築自嗤無夢路看  
君霜翮事孤鶩

慰吳明府闇生失職并邀寓集團

憔悴年來向水濱蕙稠蘭柵漫相親麥魚載起蘆中色簞豆能推  
桑下人單父厲聲琴裏調萊蕪罪格甌間塵繇來守職難爲吏窮  
海雞栖有負薪

壽方良一四十

知君懷尙勝玄英抱膝長閒松桂情脉望字充雲母飯泥丸人誦  
藥珠經叩門頻有騎魚客隱几時聞馭鶴笙秋露瀼瀼幽可採相  
期茆頂劖青精

龍泉菴二首

香界岩巖判俗氛藤垂磳戶碧紛紛遠山自露詩中岫深壑長棲  
夢裏雲蟬弄秋吟渾似鳥僧分茗椀亦成嚙雲林且喜無人跡宵  
窺青峯下鹿羣

嫋嫋秋風叢桂枝藍輿骨負北山期朝飡每與堂僧共幽夢猶嫌  
野鶴知砌冷儘供蟲語沸峯高何礙月歸遲濯纓時過清溪山來  
往閒魚幸不疑

十五夜西峯看月

山月識鐘聲鐘動月亦上鮮潔映空林艸木發光相西峰在伐柯

振衣事孤往幽深已足快于此晤軒朗塵累盡唐捐空明入非想  
但覺銀海波浮光浸天壤石骨爲之寒山靈亦演漾所以松風生  
羣峯劃然響

十六夜再同諸社子西峯看月

香閣切幽岑晚鐘清且窈就月登西峯峯端月初晶乍覲快孤明  
坐久更深悄白毫現空林冷光襲棲鳥方袍二三人結趺當木杪  
笑言衆壑聞析義天花繞遙見前湖白或恐下方曉

石巢夜起看月已而雨

山月還未沒山雨旋廉纖月以延孤光雨能暝餘炎清景天所闕  
二者常不兼而獨巖栖人晴雨兩無嫌如花寄瓶中信手隨所拈  
對月空芳樽往往意不厭趁此微雨過植杖攜腰鑣殲彼石上蕨  
待此峯頭蟾倦卽枕曲肱吟則掀疎髻石榻橫秋窗窗冷夢亦懨  
久拜兩疏疏穩作陶潛潛乃知丘壑中恣取元不廉適意斯已矣



來日吾何占

冬日同元甫集倪世符藕花居得疎字

蕭條歌謝楚人興  
來藉琴樽媚索居  
遵渚影依鴻雁後  
醉香心繞芰荷初  
語翻風海能辭綺  
杯點霜筍可耐疎  
汐社饒君整寒色  
葭蕤遙與賸江魚

出都別馬時良汪遺民

捧檄寧親代所稀  
石湖況有舊漁磯  
輕舟喜共湍鷗下  
鄉夢先于社燕歸  
計日江城飛柳絮  
歸家山館唼松圍  
長林幸戢孤飛翼  
敢向鵬鷺判是非

吾廬卜築大江邊  
江上秋雲倍可憐  
沽酒直于漁網下  
濯纓即在艸堂前  
青青桃葉迴歌扇  
白白蘆花覆釣船  
更有洞簫吹月夕  
邀遊何異挾飛仙

贈黃博士王屋

吾友黃王屋文章燦如綺民社豈不諳不易讀書美所以一鳴琴  
但飲長淮水猶然畏折腰棄之復如屣臥轍父老嗟候門童穉喜  
再坐梁園氎談經破臯比修竹鳴清風其心亦如此六館俊髦窟  
君來執牛耳奇縉石鼓文博極天人旨貫酒苦無錢環堵都種紙  
余官亦多暇清齋長隱几於此挹汪洋吾以銷吾鄙

送余駕部集生予告二首

榆塞駸駸鐵騎摩盾頭試艸墨花新久推馬脊多高骨不辨龍額  
有逆鱗薑桂豈投羹鼎好薜蘿因寄漆園身慙余小艸占華省簪  
筆虛稱獻納臣

石頭葭莢正蒼然一葉身輕去若仙仗馬長鳴開紫禁冥鴻高翮  
入青天就荒松菊瞻衡宇無恙風波有釣船我欲小舟汎江海石  
門晴日臥秋煙

憶石巢水雲蘭若諸衲

夢尋支遠輩鐘磬若微聞偶見梁間月思君嶺上雲栽蓮追白社  
縱鶴入青雲莫戀山窗翠芭蕉又不分

失計學干祿長歌懷採薇還嫌握手日不見梨花飛雙樹栖煙冷  
疎鐘報雨微夜深山葉響好待倦雲歸

趺坐憶終日相看惟一峯滿山多種芋乘雨或移桐須掩竹房臥  
不然嵐氣濃朱門等蓬戶吾欲笑深公

次淮陰喜家僮迎至

青山漸與皖峯隣山色迎人較亦親江樹宮雲千里夢賓鴻社燕  
兩年身懸知薄宦成飄泊未敢逢人道苦辛此日故園風景好藕  
花爭放稻香勻

淮陰贈蔡遊戎生府

任城昔問何其夜淮海今逢宛在人不耐折腰寧訝黜苟能存舌  
莫憂貧劍辭蜀徼風塵色甕貯兵厨麴米春散髮釣魚無不可絲



來熊夢到垂綸

高郵集彭水部孝弱調鶴軒

翻是郎官舍能生隱者心伊人同野鶴其樹類祇林滿徑覆深艸  
當軒巢水禽隣牆出高柳還與乞清陰

粉署虛生白冬曹夏亦寒排衙蒲稗曲判事水雲端鑿牖正當竹  
滿堦多種蘭不知人境裏亦復有僊官

感遼事四首 己未春

帝日長臨東海波赴湯其奈釜魚何大車有骨專長狄小醜無知  
比尉陀行役年來問原隰憂天夜起視星河毛隣徼外山如雪勒  
石行看屬斧柯

落日腥沙白骨橫春風不到受降城錦貂瘞名王帳刁斗虛傳漢  
將營萬竈可憐埋艸露長弓何日下欃槍兪兒瓠種咸充幕銅虎  
還徵樂浪兵

拊心忍憶聖躬勞下瀨樓船合度遼儘有懸金酬士死誰其飲羽  
射天驕春風塞艸青無色夜雨幽燐碧未消天馬不來濛谷冷祁  
連空築漢嫖姚

戎索承平未可寬羯奴無賴抵三韓城邊烏尾訛偏劇殿外螭頭  
影尙寒苜蓿黃雲屯萬騎梅花火樹照千官夢回雞塞聽燈市簫  
鼓闐闐未肯闌

奉使涼州出都門

雲開春殿詔初承絳節傳呼到五陵曉騎纔迷燕市雪朝炊忽煮  
白河水暫拋馬上櫻桃籠且劇龍山柳檿藤瓦枕竹床無恙否題  
書先問石巢僧

渡易水同衷朴瑕仲旅酌

風過易水尙蕭蕭古柳攢岼發短條茅屋數椽成小聚土杯一醉  
買春醪危橋剩雪遲驅馬野戍團煙隱佩刀却憶江南好風景酒

帆高趁石門潮

滕陽道中

官橋河畔柳垂垂立馬躊躇看古碑處處雞豚喧社鼓家家兒女  
繅春絲炊煙不散田文墓握粟還尋管輅祠薄暮千林桑柘黯蕭  
條井里悵吾思

漢高皇廟

芒碭雲飛去不還荒祠今古寄山顛悠悠驅馬問野渡漠漠閒禽  
過水田艸昧龍蛇寒食雨蕭條弓劍大河煙可憐戲馬臺相望一  
樣春風開杜鵑

長安道上戲贈汪休伯

休伯善醫

經年服食學長生佩有茱萸粲紫英却笑臨邛病司馬誤從天上  
乞金莖

青袍白馬黃塵邊肘後素書長高懸蛛網莫教封藥裏秦中天子



好神仙

題李文清文學友雲館

層樓出河漢慷慨望西京宮闕暮煙靄陵園秋艸生平沙延獵火  
古戍帶笳聲此際江南客登臨無限情

洮州健兒行

洮州健兒騎大馬道逢高軒不肯下擊鮮賭酒剗牛羊芻粟紛紛  
掠原野頭白老翁驅負薪小姑小娘令抱衾酣歌大嚼意不足抽  
刀橫索床頭金吁嗟乎此曹虓豁慘于虜芥蚩尸僇日還營氈裘  
未掃板屋空萬戶千村淚如雨醜奴螳臂逆顏行海西烽火明遼  
陽若斬樓蘭報天子士女何惜傾壺漿所嗟此曹朝氣索羈鷹一  
飽不復搏可能鳴劍馳伊吾未必據鞍誇矍鑠縱金伐鼓聞雷坪  
高牙大纛呼將軍坐看部曲擇人肉充耳銜枚如不聞

秦中初度口占

秋風瑟瑟鴻雁號敝裘羸馬黃塵高泥沙委頓不知苦旅館清樽  
傾濁醪樽中爛爛明長庚蓬弧始憶懸茲辰日暮山城急砧杵霜  
酣江上思鱸葦玉帝醉擊歌慨慷悠悠逝水如年光五斗飯粟長  
齷齪二毛點鬢空蒼琅三十執戟已不早道傍徇祿胡艸艸徑中  
松菊幾荒蕪肘後垂楊日枯稿吁嗟乎男兒手不艸平胡便當散  
髮歸江湖捕魚射鴈無不可耳生車中謀則左

同豹叔宗白夜集

涼雨洗庭樹人閒月復然  
盜申評菊夜燈澹欲霜天  
幽諷長鄰唱清言不累禪  
吾廬釀初熟栗里倘無懸

沉香亭

海棠長睡不曾醒濃艷餘香尚有亭亭北梧桐  
滴秋露遊人莫唱雨淋鈴

巫山雲雨散如煙亭樹含霜秋可憐  
莫向馬嵬問消息黃花特似

洗兒錢

名花零落野花開  
秋徑猶飛蛺蝶來  
寂寂孤亭明月轉  
更無人報打毬回

爲憶雲鬟捧硯時  
高懸醉筆寫烏絲  
欲知宮錦人何在  
秋艸寒蛩采石祠



詠懷堂詩外集 乙部終

CORNER UNIVERSITY

MAY 15 2001

EAST ASIAN STUDIES









